

初唐四傑集

冊三

卷之四

四

初唐四傑文集目錄

楊炯二

登秘書省閣詩序

崇文館宴集詩序

李舍人山亭詩序

送徐錄事詩序

送并州旻上人詩序

晦日藥園詩序

羣官尋楊隱居詩序

宴皇甫兵曹宅詩序

送東海孫尉詩序

宴族人楊八宅序

王勃集序

梓州官僚贊

梓州惠義寺重閣銘并序

公獄辯

文皇南征傳序

聖旨書

新編詩話

狂狷集

雙清齋集

善入山草詩

洋人書

登瀛書

對

所惠四第文集目錄

初唐四傑文集卷十一

楊炯二

登秘書省閣詩序

若夫麒麟鳳凰之署三臺四部之經周王羣玉之山漢帝蓬萊之室
觀星文而考南北大象入於璣衡披帝冊而質龍神負圖出於河洛
司先王之載籍掌制書之典謨劉向沈研揚雄寂寞之士於茲翰墨
馬融該博傅毅文章之才此焉游處莫不出言斯善有道可尊黼黻
其德行珪璋其事業心同匪石達人千載之交手握靈珠文士一都
之會陶泓寡務油素多閒命蘭芷之君子坐芸香之秘閣徒觀其重
欄四絕閣道三休紅梁紫柱金鋪玉碣平看日月唐都之物候可知
坐望山川裴秀之輿圖在卽虹蜺爲之回帶寒暑由其隔闊豈直崑
崙十二瀛海千尋西州有百尺之樓東國有千秋之觀於時五行金
王八月秋分風生閭闔之門日在中衡之道煙雲悽慘白露下而四

郊空林野蒼茫青天高而九州迴登山臨水無非宋玉之詞高閣連雲有似安仁之興列芳饌命雕觴扼腕抵掌劇談戲笑假使神仙可得自蔑松喬富貴在天終輕許史閒之以博奕申之以詠歌陶陶然樂在其中矣登高而賦羣公陳力於大夫聞善若驚下走自強於元晏輕爲序引綴在辭章

崇文館宴集詩序

天下之器也神立貳者所以經其化聖人之寶也大建儲者所以贊其庸易所謂照於四方禮所謂貞於萬國皇家以中樞北極清都有一天子之宮儲后以大火前星蒼震有乾男之位因心也孝常問安於寢門行己也恭每不絕於馳道有父子君臣之道焉有夏干冬羽之事焉於是發德音降明詔封紫泥於璽禁傳墨令於銀書齒於成均所以明其長幼通於博望所以昭其賓客東方曼倩之文史卽預謀祠角里先生之羽翼仍參獻壽爲賓者四友等黃龍之簡才論奏者

八人同赤烏之下士莫不搢紳舊德縫掖名儒衣簪拜高闕之門驂
駕陪直城之路琢磨其道玉質而金相黼黻其詞雲蒸而電激琴書
暇景風月名辰周旋揖讓觀禮儀之溢目合異離堅聞辨論之盈耳
八珍芳饌寒温取適於四時一獻雕觴賓主交懽於百拜爾其青垣
繚繞丹禁逶迤魚鑰則環鎖晨開雀窗則銅樓日闢周廬綺合解署
星分左輔右弼之宮此焉攸集先馬後車之任於是乎在顧循庸菲
濫沐恩榮屬多士之後塵預羣公之末坐聽笙竽於北里退思齊國
之音覲瓊寶於東山自恥燕臺之石千年有屬咸蹈舞於時康四坐
勿喧請謳歌於帝力小子狂簡題其弁云

李舍人山亭詩序

永嘉有高陽公山亭者今爲李舍人別墅也廊宇重複樓臺左右煙
霞棲梁棟之間竹樹在汀洲之外龜山對出背東武而飛來鶴阜相
臨向東吳而不進青溪數曲赤巖千丈寥廓兮惚恍似蓬嶺之難行

深邃兮眇然若桃源之失路信可謂赤縣幽棲黃圖勝景從來八子
闢高陽之邑居今日四郊逢舍人之置驛故知樊家失業遂作庾公
之園習氏不游終成濮陰之地其人也凝脂點漆瓊樹瑤林學富文
史言成準的葭莩爲漢帝之親凡蔣是周公之裔田孟嘗之待客照
飯無疑孔文舉之邀懽樽中自溢三冬事隙五日歸休奏金石而滿
堂召琳琅而觸目心焉而醉德焉而飽大隱朝市本無車馬之喧不
出戶庭坐得雲霄之致於是乎百年無幾萬事徒勞唯談笑可以遣
平生唯文詞可以陳心賞旣因良會咸請賦詩雖向之所歡已爲陳
迹俾千載之下感於斯文

送徐錄事詩序

徐學士風流舊舊容貌堂堂汝南則顏子更生洛陽則神人重出書
有萬覽之者實符於鄭元州有九游之者頗類於班固懷岐嶓之舊
迹想江漢之遺風粵在於永淳元年孟夏四月始以內率府錄事出

攝蒼溪縣主簿同彼漆園之莊周聊居賤職異乎安平之梁竦不憚
勞人駢驂而欲行紛紜而戒道是日也鶴鳴於野龍昇於天詩成流
火之文易占清風之卦聖主以協時同律義在於省方皇儲以守器
承祧任隆於監國留臺務靜博望時閒於是久敬之善交平生之故
友臨御溝而帳飲就離亭而出宿居成別易坐覺悲來平原二客追
子高而已遠河上諸公餞林宗而有慕兩鄉風月萬里江山修路爲
下泣之思長天非寄愁之所何以處我戒之必軾何以贈行上路不
拜孫子荆傾國之送豈若是乎潘安仁金谷之篇盡於斯矣

送并州旻上人詩序

三元日月不能改弦望之期四序炎涼不能移變通之運况乎人生
天地嶽鎮東西良時美景始雲蒸而電激臨水登山忽風流而雨散
道之常也復何言哉旻上人天骨多奇神情獨王法門梁棟豈非龍
象之雄晉國英靈卽是河汾之寶道尊德貴所以名稱並聞盡性窮

神所以身心不動徧觀天下暫游城闕劉真長之遠致雅契高風習
鑿齒之宏才深期上德芝蘭一面暫悅新知垂棘連城將游舊府雞
山法衆餞行於素漈之濱麟閣良朋祖送於青門之外是日也河山
雨氣原野秋陰風煙淒而禁籟寒草木落而城隍晚雲中振錫有如
鴻鵠之飛水上乘杯更似神仙之別左右爲之魂動金石由其色變
恆山岱岳看寶鼎於風雲帝里神州對長安於白日兩鄉綿邈何當
惠遠之游千里相思空有關山之望羣賢僉議咸可賦詩題其爵里
編之簡牘

晦日藥園詩序

天下皆知禮之爲貴用周旋揖讓之儀天下皆知樂之爲盛節金石
絲簧之變是則忠信之薄飾容貌於矜莊風俗之微陶性靈於歌舞
殊不知達人君子遺形骸於得喪之機心照神交混榮辱於是非之
境非若諸公者大夫之相知也以爲煙霞可賞歲月難留遂欲極千

載之交歡窮百年之樂事莫不如珪如璋令聞令望濟濟鏘鏘同會
於文場者也於時丁丑之年孟春之晦歲陰入於星紀斗柄臨於析
木衣冠雜沓出城闕而盤遊車馬駢闐俯河濱而帳飲乃有神州福
地上藥中園左太沖所云當衢向術潘安仁以爲面郊後市九莖仙
草搖八卦之祥風四照靈葩沍三危之寶露豈直帝神農旋赤鞭而
驅毒崔文子擁朱幡以救人山圖採之而得道姮娥竊之而奔月若
斯而已哉加以回溪漱石茂林脩竹澹風日之逶迤妙山泉之體勢
然後搴杜若藉芝蘭高論參元飛觴舉白凡我良友同聲相應心冥
寵辱推富貴於皇天事一窮通任運隨於大命若使適情知足則玉
帛子女爲伐性之源達變通機則尊官厚祿非保全之地所以列坐
羲皇之代安歌帝堯之力陽光稍晚高興未闌請諸文會之游共紀
當年之事凡厥衆作列之於後

羣官尋楊隱居詩序

若夫太華千仞長河萬里則吾土之山澤壯於域中西漢十輪東京
四代則吾宗之人物盛於天下乃有渾金璞玉鳳戢龍蟠方圓作其
輿蓋日月爲其扃牖天光下燭懸少微之一星地氣上騰發大雲之
五色以不貪爲寶均珠玉以咳唾以無事爲貴比旂常於糞土諸侯
不敢以交遊相得三府不敢以辟命相期與夫形在江海心游魏闕
跡混朝市名爲大隱可得同年而語哉天子巡於下都望於中嶽軒
皇駐蹕將尋大隗之居堯帝省方終全潁陽之節羣賢以公私有暇
休沐多閒忽乎將行指林壑而非遠莞爾而笑覽煙霞而在矚登塊
圯踐莓苔阮籍之見蘇門止聞鸞嘯盧敖之逢高士詎識鳶肩憶桑
海而無時問桃源之易失寒山四絕煙霧蒼蒼古樹千年藤蘿漠漠
誅茅作室掛席爲門石隱磷而環階水潺湲而匝砌乃相與旁求勝
境遍窺靈跡論其八洞實惟明月之宮相其五山卽是交風之地仙
臺可望石室猶存極人生之勝踐得林野之奇趣浮杯若聖已蔑松

喬清論凝神坐驚河漢游仙可致無勞郭璞之言招隱成文敢嗣劉安之作

宴皇甫兵曹宅詩序

皇甫君冠冕於安定李校書羽儀於隴西岑正字明目於漢南石宮坊抵掌於河朔高侯邦之司直下走齊之濫吹若夫風雲龍虎水火陰陽隔千里而應之莫不潛契於同聲矣聖明千載區宇一家掩八紘以得之莫不高會於中京矣是日也河圖適至海鯨初死五嶽四瀆漢皇帝崇其望祀一日三朝周天子展其莊敬君臣慶色朝野歡心元宴先生開甲第而留賓二三君子赴龍門而廣讌陰雲已墨肅氣彌高霜寒萬里之園冰納千金之水面郊後市卽爲潘岳之居累代通家咸言李膺之客百年何計相知在於我心四海何求爲樂止於名教抽毫進牘皆請賦詩日暮途遠聊裁序引

送東海孫尉詩序

東川孫尉文章動俗符彩射人官裁下士宣大夫之三德運偶上皇
作東南之一尉庸才擾擾流俗喧喧談遠近爲等差敘中外爲優劣
殊不知三元合朔九州同軌蓬瀛可訪還疑上苑之中日月不占更
似靈臺之下彼其之子未爲後時凡我友朋無勞疑別徒以士之相
見人之相知必欲軒蓋逢迎朝游夕處亦常烟波阻絕風流雨散去
矣孫侯遠離隔矣但當晨看旅鴈君逢繫帛之書夕望牽牛余候乘
槎之客未能免俗何莫賦詩綴集衆篇列之如左

宴族人楊八宅

僕聞八音繫會合其德者宮商萬壑沸騰殊其流者涇渭方以類聚
物以羣分出言斯應則四海之內可以爲兄弟吾道不行則同舟之
人可以成胡越夫俗徒擾擾天下喧喧風雲竭而交道衰勢利行而
小人長固知深期罕遇所以縱傾蓋之談高契難并所以泣相知之
晚道之行也獨在茲乎楊八官金木精靈山河粹氣一門九龍之絃

冕四代五公之緒秩天資學業口談夫子之文日用溫良身佩先王之德獨遊山水高步煙霞諸侯聞之而願交三公禮之而爭辟暫同流俗薄遊朝市人倫賞鑑同推郭泰之名好事相趨畢詣揚雄之宅爾其年光六合草色三春膏雨零於山原和風滿於城闕遙遙別館花開玉樹之宮望望八川苔發橫溪之水當此時也披雲霧傲松喬坐忘樽酒之間戰勝形骸之外雕蟲壯思則符彩驚人非馬高談則鏗鏘滿聽亶亶然信天下之奇賞陶陶然誠域中之樂事若使陳雷可作攝齊於廊廡之間管鮑再生擁篲於高門之外蓋因文會共記良遊人賦一言同裁四韻

王勃集序

大矣哉文之時義也有天文焉察時以觀其變有人文焉立言以重其範歷年滋久遞爲文質應運以發其明因人以通其粹仲尼旣沒游夏光洙泗之風屈平自沈唐宋宏汨羅之跡文儒於焉異術詞賦

所以殊源逮秦氏燔書斯文天喪漢皇改運此道不還賈馬蔚興已
虧於雅頌曹王傑起更失於風騷僂俛大猷未忝前載洎乎潘陸奮
發孫許相因繼之以顏謝申之以江鮑梁魏羣材周隋衆制或苟求
蟲篆未盡力於邱墳或獨徇波瀾不尋源於禮樂會時沿革循古抑
揚多守律以自全罕非常而制物其有飛馳倏忽倜儻紛綸鼓動包
四海之名變化成一家之體蹈前賢之未識探先聖之不言經籍爲
心得王何於逸契風雲入思叶張左於神交故能使六合殊材並推
心於意匠八方好事咸受氣於文樞出軌躅而驤首馳光芒而動俗
非君之博物孰能致於此乎君諱勃字子安太原祁人也其先出自
有周濬啓文明之裔隱乎炎漢宏宣高尚之風晉室南遷家聲布於
淮海宋臣北徙門德勝於河汾宏材繼出達人間峙祖父通隋秀才
高第蜀郡司戶書佐蜀王侍讀大業末退講藝於龍門其卒也門人
謚之曰文中子聞風睹奧起予道唯揣摩三古開闡八風始擯落於

鄒韓終激揚於荀孟父福時歷任太常博士雍州司功交趾六合二縣令爲齊州長史抑惟邦彥是曰人宗絕六藝以成能兼百行而爲德司馬談之晚歲思宏授史之功揚子雲之暮年遂起參元之歎君之生也含章是託神何由降星辰奇偉之精明何由出家國賢才之運性非外獎智乃自然孝本乎未名人應乎初識器業之敏先乎就傅九歲讀顏氏漢書撰指瑕十卷十歲包綜六經成乎晷月懸然天得自符音訓時師百年之學旬日兼之昔人千載之機立談可見居難則易在塞咸通於術無所滯於詞無所假幼有鈞衡之略獨負舟航之用年十有四時譽斯歸太常伯劉公巡行風俗見而異之曰此神童也因加表薦對策高第拜爲朝散郎沛王之初建國也博選奇士徵爲侍讀奉教撰平臺鈔略十篇書就賜帛五十匹先鳴楚館孤峙齊宮乘忌側目應劉失步臨秀不容尋反初服遠遊江漢登降岷峨觀精氣之會昌翫靈奇之胎蠻考文章之跡徵造作之程神機若

助日新其業西南洪筆咸出其詞每有一文海內驚瞻所製九隴縣
孔子廟堂碑文宏偉絕人稀代爲寶正平之作不能奪也咸亨之初
乃參時選三府交辟遇疾辭焉友人陸季友時爲虢州司法咸稱宏
農藥物迺求補虢州參軍坐免歲餘尋復舊職棄官沈跡就養於交
趾焉長卿坐廢於時君山不合於朝豈無媒也其惟命乎富貴比於
浮雲光陰踰於尺璧著撰之志自此居多觀覽舊章翺翔羣藝隨方
滲漉於何不盡在乎詞翰倍所用心嘗以龍朔初載文場變體爭構
纖微競爲雕刻糅之金玉龍鳳亂之朱紫青黃影帶以徇其功假對
以稱其美骨氣都盡剛健不聞思革其弊用光志業薛令公朝右文
宗託末契而推一變盧照鄰人間才傑覽清規而輟九攻知音與之
矣知己從之矣於是鼓舞其心發洩其用八紘馳騁於思緒萬代出
沒於毫端契將往而必融防未來而先制動搖文律宮商有奔命之
勞沃蕩詞源河海無息肩之地以茲偉鑒取其雄伯壯而不虛剛而

能潤雕而不碎按而彌堅大則用之以時小則施之有序徒縱橫以
取勢非鼓怒以爲資長風一振衆萌自偃遂使繁綜淺術無藩籬之
固紛繪小才失金湯之險積年綺碎一朝清廓翰苑豁如詞林增峻
反諸宏博君之力焉矯枉過正文之權也後進之士翕然景慕久倦
樊籠咸思自釋近則面受而心服遠則言發而響應教之者逾於激
電傳之者速於置郵得其片言而忽焉高視假其一氣則邈矣孤騫
竊形骸者旣昭發於樞機吸精微者亦潛附於聲律雖雅才之變例
誠壯思之雄宗也妙異之徒別爲縱誕專求怪說爭發大言乾坤日
月張其文山河鬼神走其思長句以增其滯客氣以廣其靈己逾江
南之風漸成河朔之制謬稱相述罕識其源扣純粹之精機未投足
而先逝覽奔放之偏節已滯心而忘返迺相循於跼步豈見習於通
方信譎不同非墨翟之過重增其放豈莊周之失唱高罕屬旣知之
矣以文罪我其可得乎君以爲摛藻雕章研幾之餘事知來藏往探

蹟之所宗隨時以發其唯應便稽古以成其殆察微循紫宮於北門
幽求聖律訪元扈於都洛響像天人每覽韋編志宏大易周流窮乎
八索變動該乎四營爲之發揮以成注解嘗因夜夢有稱孔夫子而
謂之曰易有太極子其勉之寤而循環思過半矣於是窮著蔡以像
告考爻象以情言既乘理而得元亦研精而徇道虞仲翔之盡思徒
見三爻韓康伯之成功僅踰兩繫君之所注見光前古與夫發天地
之祕藏知鬼神之情狀者合其心矣君又以幽贊神明非杼軸於人
事經營訓導迺優游於聖作於是編次論語各以羣分窮源造極爲
之古訓仰貫一以知歸希體二而致遠爲言式序大義昭然文中子
之居龍門也睹隋室之將散知吾道之未行循歎鳳之遠圖宗獲麟
之遺制裁成大典以贊孔門討論漢魏迄於晉代刪其詔命爲百篇
以續書甄正樂府取其雅奧爲二百篇以續詩又自晉太始元年至
隋開皇九年平陳之歲褒貶行事述元經以法春秋門人薛收竊慕

同爲元經之傳未就而歿君思崇祖德光宣奧義續薛氏之遺傳制
詩書之衆序包舉藝文克融前烈陳羣稟太邱之訓時不逮焉孔伋
傳司寇之文彼何功矣詩書之序並冠於篇元經之傳未終其業命
不與我有涯先謝春秋二十八皇唐上元三年秋八月不改其樂顏
氏斯殂養空而浮賈生終逝嗚呼天道何哉所注周易窮乎晉卦又
注黃帝八十一難幸就其功撰合論十篇見行於代君平生屬文歲
時不倦綴其存者纔數百篇嗟乎促齡材氣未盡歿而不朽君子貴
焉兄勔及勳磊落詞韻鏗鎗風骨皆九變之雄律也弟助及勛總括
前藻網羅羣思亦一時之健筆焉友愛之至人倫所及永言存歿何
痛如之援翰紀文咸所未忍蓋以投分相期非宏詞說潛然擘涕究
而序之分爲二十卷具諸篇目三都感作恨不序於生前七志良書
空撰得於身後神其不遠道或存焉

梓州官僚贊

昌西郡縣廣漢封疆岐嶓地德參井天光作固作鎮西南一方設官
分職鷓鷯成行

岳州刺史前長史宏農楊誼贊

楊公四代不渝淳則學以自新政惟柔克自君去矣南浮澤國日往
月來吏人思德

長史河南秦遊藝贊

州之端右必得其鄰始皇之裔厥姓惟秦其明察察其政恂恂梧桐
生矣君子當仁

司馬上柱國隴西李景悟贊

司馬柱國下成桃李永安之孫高平之子肅肅宗廟巖巖清峙士元
之才一日千里

朝散大夫行司功參軍事淄川縣公隴西李承業字溝贊

大夫李溝振振公族就養承顏闔門雍穆莅官行政人無怨讟貴而

不驕能保其祿

司倉參軍事高平獨孤文字大辯贊

大辯若訥歷官有聲是司出納我庾如京原承道濟家在高平祖德
勳伐受氏因生

司戶參軍事博陵崔翬贊

博陵崔翬文儒代有其德不愆其言不朽發揮談論抑揚琴酒知微
知章可大可久

司軍參軍事濮陽吳思溫字如玉贊

思溫吉士地藉東吳功成覆篲業就編蒲愛猶冬日罔若明珠州中
煜煜此之謂乎

司兵參軍隴西李宏贊

李宏門胄衣冠赫奕氣蘊風霜心如鐵石討論詞翰沈研載籍善與
人交歲寒無易

司法參軍事河南宇文林裔贊

宇文周後累代乘軒樂然後笑時然後言用刑勤恤斷獄平反高門
可待東海無冤

司士參軍瑯琊顏大智贊

顏氏之子閑閑大智雅善元談尤長奕思不偶流俗坐忘人事同彼
少遊能安下位

參軍事太原王令嗣字復贊

參軍王復真多俗少琴動遊魚詞驚夢鳥仲舉志大夷吾器小德義
可尊人之師表

參軍事上柱國滎陽鄭懷義贊

懷義個儻詼諧取容幕天席地何去何從

參軍中山張曼伯贊

謙謙曼伯不踰規矩節用厚生保家之主

參軍事盧恆慶贊

恆慶有地參卿迷職多士之林不扶自直

參軍事滎陽鄭令賓字儼贊

令賓茂緒凝脂點漆淑慎溫恭始終貞吉

參軍事通化縣男河南賀蘭寡悔贊

猗歟寡悔開國承家當歌對酒屬賓煙霞

參軍事扶風馬承慶贊

承慶學稼食惟人天載懷充國遠事屯田

博士尙文贊

尙文儒者優游禮樂萬頃汪汪混之不濁

錄事呂忠義贊

惟彼忠義見賢思齊出言無玷南容白圭

鄆縣令扶風竇兢字思謹贊

竇兢爲宰其身自正極深研幾窮理盡性朗如日月清如水鏡化若有神途歌里詠

鹽亭縣令南陽鄒思恭字克勤贊

克勤無怠敬慎有儀清談振玉妙跡臨池絃歌百里君子攸宜公家之事知無不爲

元武縣令孫警融贊

警融好禮宣風下邑百姓安居流亡畢集

鄴縣丞安定梁敬字敬贊

安定梁敬有文有武馬繫青絲弦門白羽

射洪縣主簿上柱國斛律澄贊

澄爲主簿操綱振領直而能溫寬以濟猛

通泉縣丞上柱國于梁客字希羸贊

希羸負劍久事戎韜功名不立州縣爲勞

射洪縣尉康元辯贊

元辯精銳風生筆端片言折獄一尉當官

飛烏縣主簿蕭文裕贊

文裕就列明經擢第優哉游哉聊以卒歲

飛烏縣尉王思明贊

思明好學博古知今友朋千里風月招尋

司法參軍楊炯自贊

吾少也賤信而好古遊宦邊城江山勞苦歲聿云徂小人懷土歸歟歸歟自衛反魯

梓州惠

集作慧

義寺重閣銘

并序

大辰之歲正陽之月有鄆縣宰扶風竇競字思昫昭宣令德光闡化猷庶政惟和萬民以理閑庭不擾退食自公遠覽形勢虔心淨域乃與禪師釋智海忘言契道寓目於長平之山援飛莖陟峭嶸削成千

仞壁立萬尋俯觀大地僅如棗葉下望須彌裁同芥子飛流滴瀝而成響喬樹璀璨而垂榮玉堂石室千門相似璧殿珠毫十方皆現慷慨棖桷之未立吁嗟棟宇之莫修不捨有爲取諸大壯觀夫左龍角右參旗前太微後營室駢羅列以雜沓瑟瑟蕭條而清冷上磊落以晃朗下泓澄而鬢黷參參差差森森纒纒千櫨萬拱乍合乍離葳葳粲粲絢絢煥煥六采五章或同或散莽如天覆轟似雲平金火合舍於垂珠日月相望於銜璧璇墀釳砌平接太階玉戶金扉俯臨閭闔曳紅日舒丹霞豐隆爲雷砰鏗訇於軒檻列缺爲電翕留霍於庭除寒暑隔闕於牆垣虹霓迴帶於廊廡仰之不極目炫炫而喪精登之無階心皇皇而失度若士翔九垓之表仍不逮於上榮大章窮四海之間猶未離於前城借如梵天之宅釋帝之宮兩曜城池五雲樓觀輪王所處純金爲說法之堂諸佛所遊衆香作經行之地亦未可同年而語也夫黃金鏤榜曾不若四攝之門青石爲牆曾不若三空之舍

殫百工之力建七寶之樓豈徒然哉良有以也故如來神力且觀嚴淨道師方便化作一城事有古而可以質於今言有大而可以徵於小是則毗耶四會俱發道心險路衆人咸知寶所其銘曰
長平山兮建重閣上穹窿兮下磅礴紛被麗兮駢交錯巖色相兮沖寂寞誰所爲兮天匠作

公獄辯

搢紳先生牧於東郡繩屬吏有公於獄者某適次於座乘間諮其所以爲公之道先生曰吾每窺辭牒意其曲直指而付之彼能立具牘無不了吾意亦可謂盡其公矣某居席之末不敢以非是爲決及退而辯其公且傳曰君所謂否臣獻其可君所謂可臣獻其否是欲彌縫其不至也及君可亦可君否亦否故平仲罪邱據踵君之意叔向譏樂王鮒從君者也所以知詢於愚或有得也尺先其寸或有長也皆庸其涓滴將助其廣大也況末世纖狡內荏外剛烏有不盡其辭

而能必究其情乎使居上者得其情屬踵而詰之可謂合於理未足
言公也若居上者異於見遠於理亦隨而鞠之取協於意所謂明於
不法烏可謂公哉且不師古之言非不可爲也爲之不能遠不由禮
之事非不可行也行之不能久故君子盡心法古動必本禮將遠而
不泥久而不亂也若乃告諸獄任意以爲明其屬徇己以爲公是使
懷倖者有窺進之路挾邪者有自容之門矣矧藁棘之內辛楚備至
何須而不克而況承執政指其所欲哉嗚呼欲人之隨意者吾見亂
其曲直矣樂人之附己者吾見汨其善惡矣而猶伐其治譽其公無
乃瞽者銜別諸五色乎

初唐四傑文集目錄

楊炯三

遂州長江縣先聖孔子廟堂碑

大唐益州大都督府新都縣學先聖廟堂碑文 并序

少室山少姨廟碑銘 并序

大東亞細亞大勝普州港海關學大聖廟堂臨文
案收身武綿安望下千响堂臨

初唐四傑文集卷十二

楊炯三

遂州長江縣先聖孔子廟堂碑

法象莫大於天地變通莫大乎四時懸象著明莫大乎日月備物致用莫大乎聖人夫子諱某字仲尼魯國鄒人也龜龍負讖帝鴻驅八翼之軒魚鳥呈文天乙降三分之璧五十二戰權輿驟帝之基二十七征草昧馳王之業平域中之禍亂掃天下之虔劉以盛德大業之尊當開階立隧之重及其山崩海竭日薄星迴歷數不還謳謠遂遠元子賓周而建國二王之車服可尋上卿翼宋而承家三命之衣冠再襲是故陰陽混合洩符瑞於平鄉宇宙氤氳灑休徵於闕里龍準而龜背月角而雷聲有軒帝之殊姿有殷王之異表山開遁甲尼邱落於紫垣星掌巫咸鉤鈐墜於蒼陸淨光童子來遊姬旦之郊乾象明靈下俯庖犧之國十五而志學三十而有成申下問於伯陽屈帝

師於郟子天爲木鐸九州知發號之期吾豈匏瓜一國有來蘇之望
嘗登委吏稍踐中都天下可臨諸侯取則以之禮而國定司空之官
以成禮以之義而國平司寇之官以成義掌山林於夏典物得其生
聽獄訟於秋官人忘其死大夫亂法仍行兩觀之誅陪臣執權卽問
三雍之罪強公室弱私家敘君臣明長幼用能使犧牲秬鬯不登闕
闕之庭羽戟旌旄不列壇場之位當斯時也三光薄蝕九土分崩夷
狄有君中華無禮周京赫赫成康之至教蔑聞魯國巖巖賢聖之餘
風已墜河圖未出吾道不行周流八方經營四海治亂運也窮通命
也荷天下之至聖仍逢盜跖之軍仗天下之至和猶有匡人之逼德
生於我樂天命而何憂文不在茲臨大難而無懼使仁者必信安有
伯夷使智者必行安有王子豈三千擊水牛蹄不能鼓橫海之鱗九
萬搏風雞羽不能扇垂天之翼然後上不臣天子下不事諸侯乘殷
之輅服周之冕或屈伸於季孟之間或動靜於魚龍之際下學而上

達將聖而多能博而無名信而好古察殷周之禮樂損益可知觀杞
宋之文章賢才不足數年學易伏羲龍馬之圖三月聞韶媯帝鳳凰
之典信存乎德術數貫於神明意見乎時制作侔於造化己所不欲
則一言可以終身人之莫違則一言可以亡國惡鄭衛之亂雅樂惡
利口之覆邦家榮辱定於樞機褒貶存乎簡牘精誠密召北辰開紫
掖之星福應全來中極敷元雲之氣乃若知幽明之故見天地之心
有感而遂通不行而克至年當甲子潛知啓漢之萌音叶宮商預察
亡秦之兆星移大火追責天司月入陽街無勞兩備季桓子羴羊之
井推水石之禎祥陳惠公集隼之庭驗蠻夷之貢賦然後歷三辰而
玉步照四極而金聲坐於緇帷之林浮於亶州之海門生七十仰天
路以無階弟子三千望宮牆而不入哲人之能事畢矣先王之至德
行矣配乎二象不能遷必至之期參乎兩曜不能稽非常之動南遊
楚國遂聞衰鳳之歌西狩魯郊獨下傷麟之泣夫子周靈王二十一

年冬十月庚子生至魯哀公十有六年夏四月己丑卒凡享年七十
二於今一千餘歲泰山頽而梁木壞微言絕而大義乖傳饗祀於百
家奉琴書於十代秦始皇見登牀之讖始亂衣裳魯恭王看壞壁之
書猶聞絲竹漢圖起於六千日賜金之禮載優魏德行於五十年刻
石之風未泯述文武者皆憲章於聖人修學校者僉折衷於夫子自
韋韞玉歷毳幕瑤圖皇天無皁白之徵戎狄起豺狼之釁摧六律絕
笙竽塞師曠之耳天下之人廢其聽矣散五彩滅文章膠離朱之目
天下之人黜其明矣我高祖神堯皇帝因三靈之寶歷藉萬國之歡
心風起北方月行中道削平宇宙戢干戈於羊馬之年彈壓華夷照
文物於龍蛇之代太宗文武聖皇帝昇瑤壇於曲洛受玉版於平河
經天緯地盪海夷嶽坐元宮而密轉紫微光帝宅之尊戴黃屋以深
居赤縣列神州之貴今上天無私覆道不虛行馭六氣而平太階乘
八風而制羣動星連月合層臺有觀朔之勞海晏河移直筆有書祥

之倦封泰山而禪梁甫千載同歸敞衢室而築明堂百靈咸秩雲行
雨施品物流行天尊地卑乾坤定矣若乃虞夏商周之禮考正朔而
三遷東西南北之人混風聲而一變環林拂日映高柳而對扶桑圓
海澄天走鯤池而涵象浦粵以乾封元年有詔追贈夫子爲太師咸
亨元年又詔州縣官司營葺學廟憑風雲於異代照日月於殊途逝
者有知歿而無朽如綸如綍大君施號令之嚴匪樸匪雕上宰極司
存之敬長江令楊公宏農華陰人也卽華山公之孫大將軍之子朱
宮帶地明河一葦之西黃闕中天神嶽千花之北山川壯麗於區宇
人物繁多於海內齊九龍而闊步一門鍾豹變之榮襲五公而長驅
四代赫蟬聯之祉出忠入孝誕秀興賢冠蓋城邑池臺鐘鼓英靈輻
輳鏘鏘萬玉之門嘉瑞駢羅濟濟千金之子是故北方多士太一壯
其魁梧南國仙人中書偉其端雅椅桐可仰丹漆兼施照明月於胸
懷吐清風於襟袖臧武仲之智卞莊子之勇可以爲大臣矣韓尙書

之臨八座發跡下邳卓太尉之踐三階來從密縣自操刀入仕聞魯
邑之絃聲解劍分司察豐城之寶氣汝陰徐令人號無雙河內王君
時稱未有飛雪千里不能改松柏之心各都十城不能動夷齊之行
先是殊方暴客常嚴鉅野之兵絕磴奸豪每縱黃池之號數州常以
爲弊歷政所不能移行人爲之聚衆耕父由其釋耒公英謀獨斷銳
氣無前奮一劍以戮元兇馳單車而躡遺噍道旁牛馬並屬羅衡縣
內神明皆稱傅炎若乃山林猛獸動星象而垂文江漢羆吐鼓風麟
而作氣城門六閉未防虞吏之災都市三言終有山君之暴公雄心
裂皆壯髮衝冠按東海之金刀飛北斗之石箭罔巒不擾有符劉孟
之城坑穿無虞更似童君之邑自非愛人猶子視物如傷豈能躬斬
兇渠親除災害與夫赤繩不用道被於瑕邱桴鼓希聞化移於京洛
可同年語哉然後示之以禮義陳之以庠序憑三時之閒暇興役鳩
工視四野之川原依城負郭青泥險磴斜連白馬之關赤岸長波遠

注黃牛之峽懸四方而開益部照參伐於天光賦三錯而闢梁州絕
岷嶓於地德背山臨水掩全蜀之膏腴望日占星採公宮之法度丹
牆數仞吐納雲霞椽柱三間蔽虧風雨瑠璃曉闢東宮雀目之窗玳
瑁朝懸西漢虵鱗之栢圖光芒於北斗聖質猶生赫符彩於連珠宏
姿可想至於月衡月準山額山庭侏侏星文堂堂日角莫不向之如
在疑遊北上之山望之儼然似矚東流之水博士助教某等西州聞
望南國英靈駭飛免於文場躍雕龍於筆海揚雄博識神遊象繫之
端李郃幽通思入璣衡之表每至韶光令月朱鳥乘春爽氣高天元
龜送歷瓊瓊玉豆中堂奉先聖之儀石磬金鐘南面習諸侯之禮華
陽曾子鼓篋來遊蜀國顏生摳衣請學絃歌在側還昇武騎之臺禮
樂居前重覩文翁之室祁祁茂德濟濟時英聖人千載之風儒者一
都之會丞主簿尉某等青田戒露望華蓋而長鳴綠地生風下仙閣
而直轡大夫貞節還居內史之丞文學明經猶歷南昌之尉鄉望某

等王孫獵騎騁原隰之盤遊公子文鋒敘江山之體勢符偉明以都
官謝職逢有道而相推趙元淑以郡吏從班見司徒而不拜僉以鄉
閭少事風月多懷命童子於靈臺就門人於相圃冬禮春詩之化再
造雙川淹中稷下之風一匡三蜀若夫平南壯烈沈流水於栽碑逐
北勳庸登燕山而刻頌庾太尉新亭之墓尙有黃金鄭康成通德之
門猶存白瓦況乎功苞大象績被蒼生豈使銘典闕如音塵不嗣是
則雕牆峻宇列冠蓋於宜城塞陌填街考春秋於太學小人狂簡不
知所以裁之夫子文章今可得而言也詞曰

西崑玉闕南海金堂惟惚惟恍一陰一陽三辰赫赫九土茫茫太極
天帝神州地皇驪連上古混沌中央降及軒頊終於夏商四時玉斗
五緯珠囊聖德千載淳風八荒天開赤籙日照青光識協金匱兵符
玉璜化隆文武澤威成康天子穆穆諸侯皇皇春秋代謝宗社危亡
帝典無象人倫不綱山河命德天地興祥禮樂三變文明一匡原承

少典祚啓成湯吹律丹鳳銜符白狼三仁去國再命循牆不有積善
其何以昌降靈鄒邑誕哲平鄉月角摘彩星鈴吐芒文行忠信恭儉
溫良或默或語能柔能剛學而不厭師亦何常通禮明德尊賢毀方
古之君子昔者明王道協公旦神交帝唐攝官從事服冕端章示之
以德臨之以莊澤如春雨威若秋霜男女斯別尊卑克彰時逢板蕩
運屬栖遑入齊損味居陳絕糧登山極目臨水徜徉無道斯隱舍之
則藏季孫大賚敬叔揄揚問官鄉子受樂師襄神明協贊雅頌鏗鏘
紫麟遙集丹鳥遠翔生靈水火家國舟航功符日用德協天長倏嗟
崩嶽奄歎摧梁昧昧神道悠悠彼蒼書開壞宅讖識登牀與代輕重
因時弛張氈裘黼黻沙漠壇場璣衡慘慘載籍膏肓汾河水白晉野
星黃軒電臨斗殷雷入房九圍臣妾八極城隍東序西序上庠下庠
粵惟銅墨寶號金箱靈山地輔德水天潢芝蘭秀出羔鴈成行玉匣
孤劍瑤臺驪驪懲奸挫右濟猛移蝗風傳積石道被滄浪絲言渙汗

經葺相望夏井蓮植秋窗桂芳繡楹文珎綺綴明璫四注飛閣三休
步廊禮行釋菜敬盡明鄴圖非有若地異空桑伏羲書契女媧笙簧
匏土金石珪琮璧璋高門程鄭碩學王楊威儀秩秩宮徵瑒瑒山棲
烏鳥水宿鴛鴦蜀門荷戟江津濫觴落星高堰明月回塘丹碑不朽
清廟無疆

大唐益州大都督府新都縣學先聖廟堂碑文

并序

敘曰銀衡用九天門壓西北之荒銅蓋虛三地戶圻東南之野迴七
星於上列太清不能潛混茫之機環四海於中州巨塊不能祕生成
之業聖人有以見天下之蹟擬諸形容聖人有以見天下之動行其
典禮靈圖廣運百姓日用而不知神理潛行萬方樂推而不厭古者
熊山南眺金崇橫上帝之居鳳穴西臨玉室考元皇之宅五龍乘正
按天讖以希微六羽提衡驗星謠而汗漫洎乎尊盧赫胥之代驪連
栗陸之君皇名邁於上元帝圖始於中葉莫不憑三靈之寶位鼓舞

陰陽藉六合之尊名財成宇宙未有貴而無位博而無名大禮由其再造大樂出其一變蕩蕩乎民無得而稱焉巍巍乎其有成功者也若夫司徒立勳於天地還承帝嚳之家微子開國於商周仍纂成湯之業雖元禽歷數推移於景亳之都而白馬旗常赫弈於風邱之國由於千年有屬萬物知歸乾坤合而至德生日月會而明靈降奎婁胃昴風驅白虎之精角亢房心雲鬱青龍之祉君王異表儀石紐而法丹陵輔相宏資壯臯陶而圖子產豈止鑿就元象擒光芒於北斗之宮括成地形騰瑞氣於東山之曲非天下之至精其孰能與於此神冥造化德合陶鈞獲沖用於生知運幽機於性道窮庶事之終始協庶品之自然覩者不識其靈仰者不知其德步三光於太極昭曜三門含萬象於中區聲明萬國惟深也能通天下之志惟幾也能成天下之務非天下之至神其孰能與於此道尊德貴挫銳同塵始於中都宰終於大司寇能使長幼異節男女別途路無拾遺器不雕僞

奸雄獨立初明兩觀之誅政教未行仍赦同狴之罪盟齊侯而歸四
邑夷不亂華黜季氏而覆三都家無藏甲非天下之至剛其孰能與
於此青光歎滅赤籙衰微一匡爲海岱之尊一戰有河防之霸故得
三王不相襲禮亡於寇戎五帝不相沿樂入於河海是以哀生靈之
板蕩痛寓縣之分崩歷聘諸侯栖遑異國其爲大也法象莫之能容
其爲高也黎元莫之能覩時非我與遂厄宋而圍陳道不吾行終樂
天而知命非天下之至柔其孰能與於此泰山不辭土壤故能成其
高滄海不讓細流故能成其大自季孫之賜我也交益親矣自敬叔
之乘我也道彌尊矣於是歷郊社之所考明堂之則金人右對仍觀
太祖之階斧展前臨還訪周公之位然後刪詩書而續易象動天地
而感鬼神運百代之舟車開千齡之戶牖是故雷精日角聞道德而
摠衣月頰山庭奉琴書而撰杖非天下之至文其孰能與於此智以
藏往有感而必通神以知來無微而不照論五行於帝輔潛觀太皞

之先揆七廟於天災預察釐王之過星流十月徵歷象於衰周日泛
三江採謳謠於霸楚神無方而易無體聖人通變化之津河出圖而
洛出書聖人悟興亡之兆非天下之至明其孰能與於此極天蟠地
之禮周旋揖讓之規百神於是會昌二儀以之同節非禮無以別父
子兄弟親疎之序非禮無以辨君臣上下長幼之位本之於元氣徵
之於太古德足以法於九圍道足以周於八極服先王之制度黜紅
紫而無施斂上帝之明威感風雷而有變非天下之至恭其孰能與
於此五行四氣十二月還相爲本五聲六律十二管還相爲宮至音
將簡易同和廣樂與神明合契盛於中國還陳武象之容奄有四方
自得文王之操南風奏雅知大舜之溫北里宣淫體殷辛之暴非天
下之至和其孰能與於此悲夫日中則昃動靜之常也月滿則虧盈
虛之數也自太平王佐委龍翰於芳年禮樂霸臣摧虎文於華月則
知天之將喪也則知道之將廢也雖復頽山壞木兆悲歌於兩楹夏

棟周牆陳威制於三禮猶使文明炤爛百王知察變之機鐘石鏗鏘
萬代挹希聲之樂信可謂備物致用立成器以爲天下利者莫大於
聖人也旣而三河失統九州之寶幣不歸四塞提衡萬里之長城繼
作星祆日祲乾象暗而恆文乖禮壞樂崩彝倫斃而舊章缺洎夫碣
山休氣潛膺赤帝之圖沛國真人密召黃星之錄尊褒成之厚級殷
崇聖之榮班學校於是大興文武由其不墜年當晉宋運距周隋泰
山覆而岷崙倒天柱傾而地維絕三重赤暈還開爭戰之端千里黃
埃洊有干戈之務亂罹瘼矣黔首何依王室蠢然蒼生無主閭閻卮
地今來爲講武之場荆棘參天昔日作談經之市皇家撥亂返正應
天順人鼓之以雷霆潤之以風雨馳櫜槍而掃穢上廓鵬雲決河海
以澄奸下清鰲極今天子握大象運洪鑪星重輝海重潤乾迴北列
垂衣裳於太紫之宮日出東方備法駕於中黃之道混沌之無天無
地盡入提封伯陽之有物有象咸乘禮節太階三襲明瑞氣於朱符

中極四游法祥光於玉燭東膠西序雲閣蓬邱國號陶唐成鄒魯
遂使西山童子陳歌謠於璧水之前南國老人受几杖於環林之下
乾坤之大德行矣皇王之盛節明矣江邠鄙黍晨昏薦帝之祥鳳穴
麟州晷刻因天之瑞乘輿乃選吉日協靈辰詔風伯以行觀促雷師
而出豫房爲天駟仍施列缺之鞭斗爲帝車卽動招搖之柄奠玉帛
奏金絲登介邱下梁甫擁神休而尊明號莫之與京按玉冊而考銀
繩於斯爲盛於是迴輿轉旆臨曲阜之郊畿駐蹕停鑾訪雲壇之軌
跡若使九原可作大君得廊廟之才千載有知夫子託風雲之會卽
以乾封元年追贈太師禮也咸亨元年又詔曰宣尼有縱自天體膺
上哲合兩儀之簡易爲億載之師表顧惟寢廟義在欽崇諸州縣廟
堂及學館有破壞并先來未造者遂使生徒無肄業之所先師闕奠
祭之儀久致飄零深非敬本宜令州縣速加營葺新都學廟堂者奉
詔之所立也因三農之暇陳複道之規考幃帳於西京訪埃塵於東

魯梅梁桂柱深沈風雨之津鏤檻文椀曠望江山之表納流雲於上
棟白日非遙披濁霧於中階青天在矚雕鐫暉煜窮妙飾於重欄山
海高深盡靈姿於反宇門生侷侷如陪文杏之壇胄子鏘鏘若預崇
蘭之室每至南方二月草樹華滋虵陸三秋風煙搖落莫不列蘋蘩
於上席行禮敬於質明奠椒桂於中尊敬神明於如在爾其邑居重
複原野平蕪出江干之萬里入參星之七度龜城藹藹煥繁霞於百
尺之樓蛟浦澄澄洗明月於千秋之水文翁舊學日往年歸劉禪平
堂煙荒霧慘武侯龍伏猶觀八陣之圖壯士弛崩仍辨五丁之石左
巴右獠之勝域陸海三江之奧壤大都督周王天皇第八子也元元
繼天而作降仙才於玉斗之庭武昭應運而生開霸業於金城之域
五潢高暎流滋液於咸池十日旁羅散光華於若木星懸帝子遙澄
井絡之郊岳列天孫遠控彭門之野姬公以明德之重行寶化於周
南曹植以懿親之賢發金聲於魯北通議大夫行長史南陽夾恆隋

十二衛大將軍榮國公之元子申侯太岳鎮其靈襟傳說長河昭其
神彩龐士元聚西申之逸羽始踐題輿管公明絆東道之雄姿初臨
別乘朝議大夫守司馬宇文紀左衛將軍靈州都督之次子台門鼎
族傳呼榮戟之榮玉質金相海若河宗之寶庾冰清識得嚴令而非
常桓溫貴遊無郗公而不樂縣令鄭元嘉滎陽人也東周玉裔北海
金宗列矛戟之森森吐風流而舊舊尺兵不用瑕邱有上德之君枹
鼓希聞洛陽有神明之宰丞京兆韋德工主簿扶風馬仁礪尉清河
張嗣明北地傅懷愛等荆藍灼爍鄧杞扶疎許元度入風月之清關
郭林宗獲神仙之妙境南昌晦跡共梅福而齊衡左部韜真與喬元
而等列博士張元鑒助教費仁敬等碧雞雄辯則滄海沸騰白鳳宏
辭則煙霞噴薄一州聞道親居典學之官四子乘風來聽中和之曲
圓冠列侍執巾烏於西階大帶諸生受詩書於北面泮宮之上更開
通德之門小學之前復見華陰之市鄉望等魚文驥子震耀於平原

漢女巴姬駢羅於甲第杜陵亭長終成輔相之才桐鄉嗇夫且著廉
平之號莫不公私務隙卽聽絃歌陰雨時閒仍觀俎豆逍遙城郭拜
夫子之靈祠髣髴風塵見夫子之遺像天道之璣衡莫測下問書生
陽精之遠近未知來求小子當仁不讓思齊於上古之名遊聖難言
有媿於中郎之石其辭曰

太虛寥廓洪鑪噴薄上綴三宮旁清八絡元精獨化聖人攸作鼇柱
爲居龍門是託爰清爰淨惟寂惟冥其一龜識韜名魚圖表靈火紀雲

紀天正地正君臣禮制宇宙輝明文武旣沒成康遂行羣飛海水若

羽天星其二玉筐曾裔金符遠系鐘石雖遷山河不替乾坤降德陰陽

合契虎嘯風清龍騰雲逝三元載停萬方攸濟其三魯道旣昏緜緜若

存祿移公室政在私門學而方仕謙而彌尊聽之也厲卽之也溫義

責齊國刑懲季孫其四多能惟聖道廢惟命天下莫容諸侯走聘至於

是邦必聞其政仁義立身溫恭成性不圖爲樂終悲擊磬其五九野八

方栖栖遑遑從周返魯考夏觀商先王道術夫子文章可久可大爲
龍爲光星衡入室月準升堂其六智周通塞神兼語默頎然而長黯然

而息漢承周運胡亡秦國察往知來研精茂德無必無我自南自北

其七萬象皆尊千靈共同惟變所適居常待終樂天知命匪我求蒙北

辰之北東海之東百王遺訓萬世餘風其八時亡玉斗運鍾陽九周井

龍沈秦原鹿走生人卷舌道路鉗口禮樂崩頽典章殘朽萬邦請命

三靈授手其九日角昇圖星精應符載揚風教重闡規模數遷三國年

當五胡星芒夜指日暈朝枯環林摧折壁沼荒蕪其十赫矣高皇粵若

稽古丕哉文皇照靈下土地維旁綴乾紘上補鯤化三千龍飛九五

爰有列聖重規襲矩其十一我君文思念茲在茲金鏡八海珠囊四時

三雍九室秋禮冬詩絳帳語道青衿質疑載垂仙渙廣創靈祠其十二

披圖按籍遠求陳跡玉檻煙開金窗雨闢碎儀侃侃雲居寂寂弟子

樞衣門人避席階列簠簋庭羅絲石其十三地接臨邛山橫劍峯滇池

初唐四傑文集 卷十一 楊炯 十一 中華書局聚

躍馬沮澤蟠龍中望擊節高門叩鐘陰靈舂響文雅雍容書池必變
坐席常重其十四今還古往寂寥無尚泰山既頽吾將安仰梁木斯壞
吾將安放異代風行殊塗影響敢立言而徵聖冀得意而忘象其十五

少室山少姨廟碑銘

并序

臣聞崑崙西北之天門也則五帝處其陽陸三王居其正地泰山東
南之日觀也則秦皇刻其石銘漢帝探其玉策故知建都邑正方位
劃崇墉剡濬洫必憑天地之險然後四海爲家擁神休尊明號協時
月同量衡必致山川之祠然後羣神受職少室山者山岳之神秀者
也憑河圖而括地用遁甲以開山發揮宇宙之精噴薄陰陽之氣壁
立而千仞削成而四方北臨恆碣猶如聚米南望荆衡纔同覆篑共
工觸皇天之八柱未足擬議龍伯釣溟海之三山無階想像考於含
神霧白玉猶存驗於山海經黃花不落其名有序則太室西偏其位
可知則嵩高佐命若乃乾坤之所合雷雨之所交仰躔七星之野俯

鎮三河之曲朝市臨於域中樞機正於天下六合交會於是乎有天
帝之下都九州名山於是乎有靈仙之窟宅臣謹按少姨廟者則漢
書地理志嵩高少室之廟也其神爲婦人像者則古老相傳云啓母
塗山之妹也昔者生於石紐水土所以致其功娶於塗山家室所以
成其德后宗之位象南宮之一星外戚之班比西京之列傳惟幾不
測其道無方騁神變而揮霍降精靈而胎饗亦猶蔣侯三妹青谿之
軌跡可尋虞帝二妃湘水之波瀾未歇何止祠稱丁婦廟號滕姑少
女宅於西宮夫人館於南嶽山臨白岸空開石室之靈浦對青崖獨
有金臺之異若斯而已矣時更魏晉數歷周隋四望於是莫修八神
以之無主炎涼代序寧觀俎豆之容霜露沾衣非復絃歌之地國家
乘天造之草昧屬人謀之與能奄有大寶遂登神器天地水火之無
象則女媧氏補之於是乎鍊其五石東西南北之失位則神農氏立
之於是乎甄其四海天皇貴與天乎合德富與地乎侔貲窮變化之

理盡神明之數伏犧畫卦唯觀鳥獸之文黃帝垂衣蓋取乾坤之象
利兼於成器功周於備物瑤臺美化闡邦國之風猷銀榜嘉聲茂君
親之典禮稱才子者八族則叔獻季狸有亂臣者十人則太顛閔夭
若夫圓邱方澤所以享天神地祇複廟重檐所以序文昭武穆命秩
宗之位分太宰之官考虞夏之質文定殷周之損益其大禮有如此
者高陽有飛龍之樂始會八風帝舜有儀鳳之音初調九奏后夔典
其教制氏辨其聲鐘磬笙竽致其和尊卑長幼成其序其廣樂有如此
此者太微營室明堂布政之宮白獸蒼龍象魏懸書之法下應猶草
王言如絲北辰而拱衆星南面而朝天下其爲政有如此者糾萬人
者施之以八刑詰四方者戒之以三典畫衣不犯載酒無冤免禽獸
於網羅納寰瀛於軌物其恤刑有如此者周人之養國老始闢西膠
漢氏之召諸生初開太學辟雍所以行其禮泮宮所以辨其教童子
五尺羞稱霸后之臣冠者六人惟述明王之道其文德有如此者涼

風至司馬於是乎陳兵太白高將軍於是乎宜戰乘斗杓而誓旅出
星門而杖鉞莊周稱天子之劍舉之按之呂望言聖人之兵如風如
雨其武功有如此者稽其殷令有文犀利劍之効珍考其周書有茲
白乘黃之騁力東漸西被南馳北走盧敖之窮觀六合不出於城隍
陶侃之飛入八門未遊於仙室其疆理有如此者察璿璣而孚大運
天迴地遊吹玉律而部人時陽動陰靜煙雲蕭索而合彩日月淑清
而啓日豈直鳳巢阿閣入軒后之圖書魚躍中舟稱武王之事業其
休徵有如此者然則囊括混沌發揮生靈大庭不足使驂乘驪連不
足使扶輿可以會玉帛可以答靈祇行聖人之大孝旣郊祀而宗祀
昭帝王之盛節亦因天而事天猶復下聽輿人旁求故實以爲唐堯
五載無聞太室之儀殷帝八遷未卜王城之地是用陳圭置臬建周
后之兩都詔蹕鳴鑾巡漢皇之中岳熒惑先列招搖在上隱天而動
地欲野而歎山旌旗則日月運行鐘鼓則雷風相薄道伊闕據轅轅

怡然肆望邈乎周覽壯靈山之雲雨仍求載祀之經對閒寢之邱墟
思秩無文之禮於是降天渙命司存因其舊跡葺其新廟詳費務議
工徒下隴蜀之名材致荆藍之寶玉易者言乎悅使人忘其勞詩者
歌乎子來成之不日東西轆轤南北崢嶸繡栴兮雲楣光昭耀兮奪
目桂棟兮蘭檠氣氤氳兮襲人皎日登於綺疏奔星下於閨闈珠簾
璫匣上高閣而三休金柱銀楹步長廊而中宿窮山海之瓌寶盡人
神之壯麗豈直河庭貝闕俯瞰馮夷之都洛水瑤壇旁臨宓妃之館
爾其巖嶂重複岡巒左右青霞起而照天白露生而布地餘基隱嶙
仍知萬歲之亭古木摧殘尙辨三花之樹明公舊祀棟宇岿堯仙女
層臺風煙爛漫軒轅之訪大隗先求牧馬之童太一之徵少君直下
乘龍之使夫峻極也天帝因而會昌夫降神也景福由其興作於是
乎昭之以明德聽之以和聲可以羞澗溪沼沚之毛可以奠潢汙行
潦之水聰明正直唯鬼神而有知玉帛犧牲在誠信而無媿日之吉

靈之來蛻爲旌兮翠爲蓋雷爲車兮電爲策鼓之以南箕風嫋嫋而
先路潤之以西畢雨冥冥而洒道其始至也若海靜山空矐矐矐矐
昭白日於扶桑之東其少進也若移星轉漢燦燦爛爛吐明月於瀛
洲之半佩珠璣而玳瓔襲羅縠而飄颻建晨興之寶冠踐遠遊之文
履命儔兮嘯侶徙倚兮徘徊羣賢畢集衆靈咸至有西華之紫妃有
中黃之素女華山之上明星遠燭陽臺之下暮雨潛通或瓊室以飛
霞或銀臺而薦樂天孫忽降暫停支石之機神女相歡卽起投壺之
電左侍右衛則甲申之瓊石乙巳之蘭蕭妍倡妙伎則憑悅之清歌
幽靈之鼓瑟樂章旣闋禮容斯備迴風兮雲旗入不言兮出不辭荷
衣兮蕙帶倏而來兮忽而逝惟神享德降百福而無疆惟嶽配天視
三公而有典昔者夏后氏之乘四載曾開宛委之圖周穆王之御八
龍猶紀弇山之石況乎上照下漏地平天成人主宅中旁羅於寓縣
山靈顯位密邇於神州豈使令德不傳頌聲無紀由是三天降策有

南霍之升儲八丈鐫銘有西王之服道魏國鍾繇之字惟勒歲年晉家張載之文遂成明制其詞曰

上帝有命皇天無親樹之元后以牧蒸人光宅六合懷柔百神德成

郊祀禮備宗禋其一軒稱配永岷墟帝出堯號則天汾陽詔蹕觀人設

教協時同律有感必通無文咸秩其二皇家啓聖受命於天上鍊五色

旁疏百川開階運斗宅海乘乾王母益地周公卜年其三天子建德重

規疊矩聖敬日躋宗文祖武範圍三極和平萬宇率由舊章粵若稽

古其四璇宮夜敞銀榜朝開德象陰月聲符震雷山河翼戴星緯鹽梅

能事畢矣乾元大哉其五治定制禮功成作樂日月旂常夏殷正朔德

澤天外文明地角氣白星黃風搖露濁其六兩京畿甸五載巡遊馳驅

太一部列蚩尤將見大隗爰尋許由迴鑾躡躅寓目周流其七鬱鬱靈

鎮巖巖積石直上五千去天三百帝休非遠真經可覲石室徘徊瓊

膏滴瀝其八山維地德神卽陰靈瑤姬逐雨玉女隨星陰陽不測黍稷

非馨修忽年代荒蕪廟庭九其旁求祀典載垂天渙始詔林衡俄成壯

觀紫稅星錯丹梁霞煥似對青溪如遊白岸十其文狸赤豹電策雷車

隱隱中道匄匄太虛遂停龍駕永託神居天迴地止霧歇雲除其一十

衆靈睽賜羣仙容與衡岳夫人漢濱遊女洛川解佩天河弄杼顧慕

招攜繽紛儔侶同氣同聲爰笑爰語二其十于以采蘋南澗之濱于以

采藻于彼行潦日吉兮辰良浴蘭湯兮沐芳揚枹兮拊鼓奠桂酒兮

椒漿神其醉止降福穰穰三其十

初唐四傑文集目錄

楊炯四

唐同州長史宇文公神道碑

唐恒州刺史建昌公王公神道碑

瀘州都督王湛神道碑

後周青州刺史齊貞公宇文公神道碑

後因青歐陳史內真公宇文公斬首

魏州陳王其斬首

魏州陳王其斬首

魏州陳王其斬首

魏州

魏州陳王其斬首

初唐四傑文集卷十三

楊炯四

唐同州長史宇文公神道碑

諸侯計功其銘曰仲山甫式於百辟大夫稱伐其銘曰正考甫恭於三命所以揚其先祖所以示其子孫上古之初刊於禮樂之言中年以降述於宗廟之碑文質既殊條流遂廣山河永配金石長存或旌原氏之阡或表滕公之墓觀百林之字者孝廉之舊業於是乎不愆不忘讀黃鳥之詞者文範之餘風於是乎可久可大公諱珽字叔珉河南洛陽人也宇文歸之遠派宇文翰之餘秩龍火晝夜於鍾山鵬雲南北於溟海自中州圯圻上國崩離魏氏忘其寶圖齊人弄其神器則天有成命周雖舊邦文王以業重三分昭事上帝武王以功成八百陰隲下人車書混一於域中子弟星羅於海內方乎劉澤乃天漢之懿親匹以曹洪卽當塗之近屬及其隋室遷鼎唐運握符固亦

壇社仍存山河不替曾祖顯和後魏冠軍將軍朱衣直閣東夏州刺史車騎將軍散騎常侍長廣郡公周贈使持節開府儀同三司延丹綏三州諸軍事延州刺史周書有傳對揚天命保乂王家霍去病初封冠軍周亞夫始爲車騎剖符之重任在於六條建國之榮禮高於五等祖神舉使持節驃騎將軍開府儀同三司京兆尹柱國大將軍并潞肆石四州十二鎮諸軍并州總管東平郡公贈少保周書有傳材優輔弼業贊雲雷晉則羊祜儀同楚則若敖柱國王章之拜京兆天子聞其直言郭伋之莅并州諸童符其恩信考誼隋文皇帝挽郎皇朝益州青城瀛州清苑二縣令鈎深致遠直道正詞不汲汲於富貴每乾乾於日夕廣都蔣公炎非無社稷之能太邱陳仲弓自有闡門之德公慶成弧矢氣襲芝蘭劍則赤山之精照牽牛於北列鼎則黃雲之寶入天駟於東方資大孝而立身蘊中和以成德詞參變化稽百代之闕文學富圖書閱三冬之舊史司徒袁粲許之以栝柏豫

章處士禰衡目之以椅桐梓漆初任國子生擢第授道王府參軍兼
鄭州參軍事橫經太學射策王庭高陽才子宣慈惠和之譽武公新
邑濟河洛潁之間兼攝務殷參卿位重王徽之任達國士升車劉簡
之博聞中郎寓直秩滿授遂州司戶參軍事天開井絡地洩江源財
雄翕習於外區棟宇相望於近甸尹興爲政知陸續於衆人黃讜臨
官識包咸於數子尋遷絳州翼城今大梁星野少澤封圻城故絳以
深其宮都新田以流其惡實惟繁劇載著循良魯國有司無擅徵之
事南陽郡吏罷休沐之娛州府狀聞鄉亭頌德亦由禮讓之化縣竹
於是乎作歌風俗之夷浚儀於是乎刊石稍遷符璽郎尋奉勅檢校
鴻臚本官如故環濟要略掌天子之符璽劉熙釋名表京師之心腹
是分麾節式贊王侯國信不差郊迎有序遷尙書職方員外郎夏書
禹貢辨其川澤周禮職方明其物土清晨伏奏幾承題柱之恩閒夜
絜齋惟有張燈之宿詔除朝散大夫晉州司馬尋遷長史平陽舊縣

姑射靈山玉印仍存瑤城未改習鑿齒之逢宣武三命而踐侍中管
公明之謁冀州四見而登別駕詔遷同州長史河西輻輳渭北膏腴
秦地之下邦漢京之左輔使君何以爲政端右宜其得人江統知賢
直言則陳留阮宣子唐林薦善通理則汝南黃叔度王祥糾合屈公
輔之宏才荀羨逸羣壯沖天之勁翮享年六十有五以永淳元年六
月二十一日終於華州之別業嗚呼哀哉公元亨利貞文行忠信禮
樂之君子儒林之丈人當在顏冉中求自是風塵外物友于之義伯
淮與季江同寢朋從之道鮑叔與管仲推財優游大學之中藉甚平
臺之下輜車就列化洽於二州油軾當官政成於半刺道尊德貴而
大位不躋有志無時而天年不永卽以其年十月遷窆於鄭縣安樂
鄉之西源嗣子某官等詩禮預聞箕裘早學生則盡其養劉殷積粟
於七年歿則致其哀唐頌絕漿於九日占白鶴相青烏鄭伯所封有
咸林之采地晉侯所賂有河外之城邑其川渭水而玉璜其鎮華山

而金石習習旛旄紛紛野田范巨卿則素車來哭韓元良則總麻設位大夫受梁鴻之命終陪列士之墳妻子從田豫之言竟託神人之墓嗚呼哀哉銘曰

國自東部家承北平遂荒中縣奄有神京時逢日薄運改天正二王

之後三代之英其一惟宗惟祖有典有則大魏將軍隆周柱國於穆顯

考其儀不忒禮樂宣風閨門表德其二五才鍾秀百福與賢蜀都會子

漢代顏淵公之廣學其積如山公之大辯其流如川其三親則郕霍地

居周鄭人物會同歌謠鼎盛設官分職天子有命束髮登朝參卿軍

政其四江漢之流河汾之都禮優懸榻任重前樞六璽爲貴皇天降符

九州爲廣益地開圖其五平陽守土下部風俗秦晉閭閻山河軌躅緹

油之化海沂之曲始聽雞晨行復驥足其六龜長筮短吉往凶來賓朋

永訣徒御相哀華館無象元堂不開青龍水曲白馬車迴其七漠漠古

墓槭槭寒桐郭門之路平林之東天光少日地氣多風凡生物而必

死唯君令始而善終

其

唐恒州刺史建昌公王公神道碑

王氏之先代爲佐命秦之霸也則王離滅楚國而三將連衡漢之興也則王陵誅項籍而五侯同拜南陽克定應圖讖而作司空西晉聿興合譚謠而濟天下昔者伊尹伊陟但保乂於商朝太公桓公唯夾輔於周室蕭何之後居食祿而無聞鄧禹之孫在當塗而不嗣未有夏殷三統金木五遷冊命重光軒裳代襲則我瑯琊之郡有冠蓋之里乎建昌之縣有公侯之子乎公諱義童字元稚其先瑯琊臨沂人也永嘉之末徙於江外皇運之始遷於五陵今爲雍州萬年人也祖僧興齊會稽令梁安郡守南安縣開國侯祿位千石珪符五等營室迴於羽儀山河入於盟誓父方駿梁正閣主簿伏波將軍梁安郡守隋上儀同三司以惠和之性有文武之才伏波將軍從征等於馬援儀同三司開府均於鄧騭家餘積慶郡不乏賢代臨本州則元賓之

父喜形於色繼爲本守則張翥之子迎者如雲自齊國遜位於庭梁
及隋人內禪於皇室夏禹之鼎寶命集於周朝御龍之家世祿歸於
范氏公台階茂緒昂宿精靈五百歲之賢才一千年之王佐忠規武
節學府詞林元方閨門敬其有德少游鄉里稱其善人實惟清廟之
器是曰皇家之寶韻諧金石奏虞庭之八音德合珪璋列塗山之萬
國黃河一曲之水莫測其源赤城千丈之巖未階其峻羣童忽聚綴
帛而引旛旗父老相呼授履而傳兵法隋授左勳衛率非其好也河
東離析海內風塵天子溺於膠船諸侯問於金鼎能扶天下之危者
必據天下之安能除天下之憂者必享天下之樂我高祖神堯皇帝
就之如日望之如雲發三河之雷電平四海之歷象武王之仗黃鉞
一月臨於孟津高帝之執朱旗五星聚於東井公瞻烏於屋射隼於
墉陳平則間行而去楚酈生則長揖而歸漢奉符繫組觀軹道之降
王偃武修文見山陽之散馬初拜車騎將軍稍遷右屯衛將軍錄有

功也考於周典崇德報功稽於春秋策勳命爵車騎萬隊備涼土之
羌戎衛軍千兵掌京師之屯禁於時天下初定邊方未輯二十八舍
尙有吳越之妖氛一十三州猶積東南之殺氣武德四年詔公爲江
南道招慰使鼓琴而送受命而行乘使者之輜車掌行人之旌節陸
賈至於南海先責尉佗隋何入於九江卽徵黥布詔除泉州都督封
建昌縣男食邑二百戶斗牛星象舜禹精靈境接東甌地鄰南越言
其寶利則璫瑁珠璣敘其風俗則丹雉白犬公門容駟馬位列三刀
防蕙苴之譏嫌絕簡書之流謗豈直廣州清節酌貪泉於石門合浦
神君返明珠於漲海貞觀三年詔遷散騎常侍行果州刺史授期天
帝肇跡人皇南充國之舊都西宕渠之古邑罔巒紛糾天彭雙闢而
作門珠貝浮沈巴水三迴而成字公入參師友出居方伯金蟬左貂
朱旗曲蓋纔臨蜀郡卽聞來暮之歌初踐益州已聽中和之樂七年
詔遷銀青光祿大夫行恒州刺史西街畢昂北岳恒山天開太乙之

宮地列并州之鎮境分靈壽魏將樂羊之所封邑對行唐趙王惠文之所築公政成朞月風行萬里鄧晨一郡漢帝稱爲主人李廣數年匈奴號爲飛將行嘗計日郭伋不負於童兒郡異中平王觀無私於任子卽導德而齊禮亦勝殘而去殺三禾在殿將拜鄭宏兩鴈隨車坐悲虞國享年若干以十五年冬十一月二十五日薨於洛陽之清化里公家傳將相世有忠貞屬離亂之宏多值風雷之草昧河宗兩日負鼎而謁成湯渭水七年垂釣而逢西伯將軍再命刺史三遷种暘爨巴牧人之良翰龐參虞詡將帥之宏規立事於當年揚名於後代兄國印穀州刺史弟國稀仁州刺史荆枝擢秀棣萼生輝何止平輿之二龍是爲賈家之三虎唐虞之際四岳分居趙魏之間八男爲郡公雖勳參締構位總班條金友玉昆良田廣宅而能吐食下士倒屣迎賓無笑客之美人有拜賓之童隸策名委贄善始令終生當封侯克成丈夫之志死而可作無忘事君之道越十六年二月二日葬

於伊闕縣之萬安山詔贈雜物百段給儀仗往還禮也亭連長樂城
枕高都守闕塞者汝寬適伊川者辛有北瞻洛汭尙想元凱之墳東
望邢山依然國僑之墓夫人陽翟縣君河南褚氏卽太常卿陽翟康
侯亮之女中書令河南郡公遂良之妹也宋公子之流派褚先生之
苗裔宏夫人之禮傳淑女之詩有文在手歸於魯國有鳳和鳴適於
陳氏邑之石窹縣以封邱夫尊於朝妻貴於室仙人暫別初悲寡鶴
之聲寶劍纔分終合雙龍之氣以某年日月薨於某所越某年月日
祔於建昌公之舊兆長子師本大穆神皇后挽郎襲建昌公歷韓王
府祭酒岐州司士參軍定州安喜縣令譽聞州里學富邱山以卿子
而爲郎以象賢而開國朝遊楚澤暮宿燕宮東臨石柱雍爲積高之
地右會長星唐是中山之邑出遊鄰國不以陪臣見輕上謁邦君不
以屬官相待洛陽朝覲適見雙鳧東都墓田行悲駟馬以年月日終
於某所越某年月日卽陪葬於先兆次子師表左千牛備身遷尙輦

直長歷許州臨潁博州堂邑滄州樂陵縣州萬安果州西充五縣令
能傳祖業克嗣家聲有言偃之文章兼仲由之政事晨陪紫極繞鈎
陳之六星旦奉黃麾屯玉車之千乘至若繁昌土宇魏文帝之墀壇
堂邑提封漢陳嬰之侯國河分九道渤海東臨江派五津崑崙北指
莫不愛人以禮爲政以德鍾離意之禁暴不用尺刀公孫述之有神
能持五縣次子師元雋州都督府嘉徵縣丞次子師楚夔州都督府
雲安縣令芝蘭有秀羔鴈成行滇北數十尹莫大邛都之縣邑東七
百里唯有巫山之峽言其縣職夔龍入於闕門敘其邑人鸞鳥翔於
學舍咸能生盡其孝喪盡其哀積粟萬鍾思負米而何得棖題三尺
泣吾親而不見卜其宅兆麟鳳匝其岡巒陳其簠簋春秋變其霜露
思傳舊德式建豐碑戴安道作頌於鄭元蔡伯喈披文於郭泰魏武
皇讀而稱妙非所望焉夏侯湛見而陋之固其宜也銘曰

厥初兮后稷導生人兮知稼穡降及兮文王精翼日兮衣青光平東

遷兮郊鄴晉上賓兮帝鄉秦三將兮繼代漢五侯兮克昌比狼山兮
峻極等淮水兮靈長惟祖考兮鼎盛佩金璋兮疊映彼山川兮降靈
生玉樞兮青青成張良兮昴宿乘傳說兮箕星出忠兮入孝武緯兮
文經陳嘉謨兮制千里摛藻思兮揆天庭有隋兮喪亂土崩兮瓦散
皇運兮權輿人神兮攸贊值笙鏞兮變響屬天地兮貞觀河兩日兮
事殷井五星兮歸漢帶長劍兮暉煜擁幡旌兮照爛周命兮惟新雲
雷兮尙屯控東南兮荒景負江海兮未賓陳禮樂兮命使動輶車兮
麟麟用虵符兮澤國頒虎節兮山人專一方兮革面重九譯兮稱臣
天垂兮星紀地連兮交趾山草樹兮潛移蜃樓臺兮鬱起遷合浦兮
太守爲廣州兮刺史歸漲海兮明珠飲石門兮貪水侃沖天兮八翼
代出身兮萬里全蜀兮奧區枕邛笮兮倚巴渝有靈臺兮古跡有充
國兮舊都豐貂兮左珥介士兮前驅濬三刀兮持節昌兩日兮剖符
降鳴鳩兮大夏騁神馬兮長衢畢昴兮分野蘭堂兮四下漢皇帝兮

國都耿將軍兮壇社若恆山兮詔鄧猶朔方兮命賈李北平兮漢飛
郭并州兮竹馬瞻泰階兮坐躡惜天年兮不假伊大姓兮潁川有美
人兮嬋媛桂生兮因地女嫁兮因天見乘龍兮奕奕翽飛鳳兮翩翩
知遽瑗兮有禮笑虞邱兮未賢始銜悲兮晝哭終共盡兮千年卜龜
謀兮習吉陳旨酒兮嘉栗車徒儼兮在門旌旆紛兮竟術循洛橋兮
南渡從國門兮右出樹蕭蕭兮有風雲慘慘兮無日指邱陵兮一閉
與天地兮相畢悲孝子兮純深孰憂思兮可任訴高天兮泣血蹄厚
地兮崩心樹碑兮神道無媿兮詞林歷陽之都兮水沒圓嶠之海兮
山沈俾外孫兮幼婦生白玉兮黃金

瀘川都督王湛神道碑

惟漢高祖應天順人祭蚩尤於沛庭斬大蛇於豐澤則豐沛之豪傑
乘於雲矣惟漢光武龍飛鳳翔舉新市之八千破王尋之百萬則南
陽之佐命動於天矣我高祖神堯皇帝以唐侯而建國從晉陽以起

兵協和萬邦光宅天下則太原之衣冠有大勳矣公諱湛字懷元太原晉陽人也十一代祖卓晉給事中母常山公主河東有湯沐邑因家焉葬於長壽縣故鄉有太原之號皇業伊始公以中涓從事賜田鄠杜間今爲雍州人也昔武王定於下人太子賓於上帝基豐鎬而開國籍神仙以命氏霸則司徒所讓位天子所不臣租則孝弟於閭門務學於師友豈直橫江斬將南登建業之臺玉食金溝北徙邛山之宅自茲厥後數百年間國移三統周人共推其代祿家徙五陵漢朝不易其冠冕曾祖邁後魏中書侍郎彭城王府司馬周春官大夫都督晉陽侯祖亮本州主簿司水上士隋贈信州刺史太名革於東魏天命集於西周宗伯所以辨其儀林衡所以平其守父綽秦孝王府掾仁壽宮監離石郡通守晉陽侯皇朝石州刺史逆賊劉武周攻陷郡城因而遇害贈代州總管諡曰烈侯禮也天造草昧王業艱難周師纔至於太原胡兵遂入於離石負戶而汲不能定西戎之禍析

骸而爨不能解南楚之圍仁者殺身以成名君子有死而無貳公承
聖賢之末代屬喪亂之宏多天子乘輿方靖秣陵之氣諸侯斧鉞莫
救驪山之烽國有命而何言邦無道而斯隱大業之季本州察孝廉
非其好也高祖乃操斗極拜圖書再駕臨於孟津五星合於東井公
解衣而濟策杖而行酈食其之長者逢漢祖而長揖袁曜卿之茂才
見曹公而不拜從平霍邑授紫金光祿大夫入長安加左光祿大夫
歷丞相相國二府典籤參軍事高祖受禪擢爲通事舍人通直散騎
侍郎封金水縣侯食邑七百戶稍遷虞部郎中丁烈侯艱去職尋起
爲隴西別駕商鄜二州刺史上柱國荊州大都督府司馬冀州刺史
定其封邑誓以河山蕭相立功於萬代留侯決策於千里願持一郡
洛陽之任耿純兼攝八州江都之拜陶侃龍朔三年遷使持節東督
瀘榮溱珍四州諸軍事瀘州刺史江陽縣地瀘水提封參伐下而爲
益州岐山上而爲井絡尺兵再戢黃昌兩日之歌槃水斯來景伯三

年之化功成露冕歲及懸車歎疏廣之知足慕祁奚之請老乾封二
年上書乞骸骨詔公祿賜同京官仍朝朔望天子歷吉日協靈辰郊
上元祀清廟詔公行太尉事國之大事攝在有司蒼璧黃琮六玉以
昭天地路鼓陰竹九變而祠祖考名遂身退居常待終山川則羣望
並走星象則中台夜坼春秋九十有三以咸亨三年七月十七日薨
於京師永崇里諡曰敏喪事官給賜物三百段米粟三百石葬日車
服往還有司監護公幼鍾偏罰毀瘠過人八歲讀詩至無母何恃廢
書慟哭嘔血數升逮事繼親孝聞州黨恩深母子比王元之事親夢
感夫妻等衡卿之至孝年纔一紀有若成人吏部薛公見而稱歎頹
川之司馬德操早知劉虞譙國之夏侯泰初深歎樂毅兵次霍邑力
戰有功高祖嘉之賜良馬一匹進圍京城爲伏弩所中高祖臨視賜
物三百段流血及屨未絕鼓音左輪朱殷豈敢言病武德之始奉使
嶺南馮盎等稽首稱臣獻琛奉贄舍人薛卓遇害北庭詔公責問單

于謝罪賜黃金五十斤雜綵二百段南踰張海北渡陰山大中大夫
去尉佗之黃屋高車使者作匈奴之鐵券離石之難也枕干而寢見
星而行號泣不絕聲者千里水漿不入口者數日同武陵之任襲入
構諸羌異河內之張武空持遺劔吳遠由其得銘王哀以之攀柏冀
州境內舊多淫祀褰帷按部申明法禁詔書遷秩百姓攀車立廟生
祠樹碑頌德亦猶欒巴典郡山鬼潛移張禹牧州江濤不起公出身
六十載遺愛二十州遂罷方岳之官仍居上台之位始於撥亂伊尹
之輔成湯終於太平軒轅之得風后然後拂衣高蹈躬覽載籍著遺
誠十八章盛行於代法文王周易之變象尼父孝經之篇窮性命之
理盡天人之際莊周著論生也若浮史佚立言歿而不朽越文明元
年二月十七日陪葬於獻陵禮也長子朝散大夫行扶風令遐觀等
生芻一束泣血三年不踰聖人之禮能行大夫之孝京兆載開其新
阡昆吾用昭其舊德百年宮室宛在章臺之東五校軍營依然茂陵

之下其銘曰

昔在湯武阿衡尙父下及高光蕭何鄧禹皇天眷命赫矣高祖惟岳
降神克生元輔攻城野戰張飛關羽奇策密謀荀彧賈詡始陪營衛
仍參幕府旌節龍沙軒旗象浦出臨方岳入調風雨其生也榮池臺
鐘鼓其死也哀陳兵復土孝乎惟孝無父何怙刊石勒銘永傳終古

後周青州刺史齊貞公宇文公神道碑

惟黃帝大電之精以太清而張樂惟高辛招搖之象以人事而紀官
於是乎生我司徒敬敷五教翼贊虞帝而咸熙庶績惟殷湯受天明
命以統九有之師惟微子崇德象賢以爲萬邦之式於是乎生我丞
相約法三章光輔漢室而威加四海自齊宣皇帝商周之日號西伯
以稱臣太祖高皇帝堯舜之朝避南河而革故司空臨川獻王懿親
明德論道經邦中庶子平樂侯開國承家丹書白馬於是乎生我齊
貞公惟魏之寶惟周之翰開上帝而格天地燮陰陽而平水土詳求

典載歷選台衡或大澤而康帝圖或高邱而濟王業諸侯五百伊尹
出於庖廚甲士三千太公起於屠釣未有上從軒后下及全齊聖主
明君三居域中之大帝師王佐累極人臣之重古所謂歿而不朽者
抑斯之謂歟公諱彪字明俊蘭陵人也卽宣帝之元孫高帝之曾孫
臨川王之孫平樂侯之子稟神河岳藉慶王侯攀兩曜之末光乘五
行之秀氣溫厚廉讓當時以爲達人宣慈惠和天下謂之才子屬三
方鼎立九土星分祿去公朝失諸侯之盟會政由梁國建天子之旌
旗士女同歎於商墟鬼神共謀於曹社公杜門屏跡心不自安與門
生故吏數百人歸於後魏宣武皇帝以客禮待之詔除給事中假龍
驤將軍正光五年兼彭城府長史假節則將軍比於王濬優禮則長
史兼於杜襲龍驤可畏晉后任之於渡江騏驎不乘魏氏託之於留
府六年除通直郎散騎常侍中書侍郎永安三年帝北巡遷撫軍將
軍銀青光祿大夫散騎常侍散騎通直起於天興之元中書侍郎始

自黃初之代宣威撫軍之號僕射光祿之名奇才總於文武重任歸於將相徐方叛逆以公爲行軍長史兼統別部仍加鼓節彭城宋邑海岳徐州嶧陽孤桐羽畎夏翟昔稱都會今實邊陲魯伯禽始得專征周穆王遂行天討公手執旗鼓坐謀帷幄以陶侃部分之明當阮季戎旅之重有如荀羨獨負逸羣之才不學江道空有連雞之喻徐州平遷黃門侍郎揚州大中正黃扉藹藹青瑣沈沈有若張公之萬戶千門博觀圖籍太湖爲浸會稽爲山有若荀勗之十郡一州詮藻人物累遷大司農秦稱內史漢曰司農管夷吾陳不涸之名耿壽昌立常平之議時播百穀后稷讓於虞書阜成兆民列卿拜於周典普泰元年遷車騎將軍加右光祿大夫永熙二年出爲潁川太守地稱汝潁俗尙申韓有鄭伯之別都有周公之朝邑教之德化無囚歷於八年任於賢能旁潤踰於九里於時齊武王居中作相實有遷鼎之謀周太祖在外持兵深懷事君之道昭公失位由季氏之執權襄王

出居成晉文之霸業三年秋八月武帝幸長安以義兵從順大統元年授開府儀同三司封靈璧縣開國子邑三百戶金堤石印清濟濁河爰賜土田以爲藩屏漢之宰相始開封邑周之烈侯實兼卿士二年拜車騎大將軍九年遷五兵尚書十年遷中書監領驃騎大將軍加開府儀同三司進爵爲公增邑一千戶天子有詔不入軍門匈奴未滅不營私第蔡謨兼五兵之署鄧騰比三台之儀掌中書之綸翰加上公之冕服十六年遷侍中驃騎大將軍以下並如故昔惟常伯今則侍中切問近對拾遺補闕冕旒無象先問顧和玉佩不存卽徵王粲廢帝後二年公不賀出爲使持節華州刺史侍中並如故桃林國邑大荔城隍三秦六輔之奧區五岳四瀆之襟帶倪寬之爲內史唯事漑田薛宣之守馮翊但知拱默尋加特進餘如故官品第一朝廷所敬辟吏如五府之間班列在三公之後唐虞之繼文德也稷契謨明於兩朝魏晉之順大名也裴王建功於二代周武成三年進封

青州齊郡公邑二千戶賜號東岳先生詔曰堯有四岳朕惟公一人
賜雜綵二千段甲第一區雍州良田百頃其優禮如此堯命羲仲星
鳥嵎夷之官周賜姜牙穆陵無棣之境三王不襲同盟固於泰山百
代相因舊國傳於負海惟保定四年公薨於長安私第天子罷朝羣
臣赴弔喪用官給嗚呼哀哉五年贈少保使持節揚光桂三州諸軍
事揚州刺史諡曰貞公禮也公少丁外艱州黨稱其孝齊武皇帝見
而歎曰可謂吾家曾閔外祖太尉公王儉謂其子侍中騫曰成汝宅
相者在此孫乎公之北歸也後魏宣武帝勅曰昔微子去殷項伯歸
漢卿又得之於今公涕泣橫流跪而對曰臣家國不造鼎祚淪亡進
不能匡正退不能死節今復托身有道何敢比德古人帝益重之及
周太祖作相西朝王侯之下皆望塵而拜公與之抗禮太祖尤相敬
待屢有諮詢嘗曰國家之子房也公體淳和之至性負廊廟之大才
孝通神明忠定社稷馬伏波來遊二帝晏平仲能事百君在魏則賈

翊荀攸在周則太顛闕天惟司徒克慎厥始惟丞相克和厥中惟公
載德克成厥終三后同其政道子孫訓其成式輝光助於日月積德
廣於宇宙以某年月日葬於少陵原國遷三代年移十紀杜當陽之
碑石沈漢水而無聞仲山甫之鼎銘入匈奴而不出曾孫皇朝右金
吾將軍同州刺史得照宏才大節玉振金聲入當天子之右軍出臨
帝京之左輔承積善之餘慶襲大宗之不遷願述家風思傳祖德是
用勒銘刻石相質披文載於景鐘大夫稱伐之義書於太常諸侯計
功之道追題瓦屑鄭康成北海之門重刻碑陰張平子南陽之墓其
詞曰

黃帝攝政勤勞耳目居於軒轅戰於涿鹿咸陽黜夏登壇受福表正
萬邦纘禹舊服其一逮乎微子周之國賓降及蕭叔宋之懿親高祖丞

相王迹是因宣皇御史社稷之臣其二太陰所立皇齊誕聖既創元基

仍集大命謀孫翼子重熙累盛天祿永終南風不競其三惟公載誕克

嗣家聲千丈多節三年一鳴待時而動以族而行才歸晉國璧入秦

庭四其符堅拜首降天之使陶豫策名勤王之事任隆起草榮高近侍

赫赫禁門雍容貂珥五其日暮青瑣夕郎之職法駕畢陳黃門次直帝

王之盛誠在農殖如京如坻我黍我稷六其吳王舊國採山鑄錢公爲

中正佩以韋絃夏禹遺跡今來潁川公爲太守示以蒲鞭七其齊稱東

帝周稱西伯諸侯謀王天子下席公之忠義如彼松柏八其發自新邑

歸於陸海魏德雖衰天命未改功成晉鄭爲而不宰寵茂山河於是

乎在九其亞夫真將去病元勳持兵對揖絕漠行軍尙書武庫抑有前

聞侍中重席曾何足云十其當塗遜位有周經野二國唐虞兩朝裴賈

出守馮翊人無訟者受封於齊實匡天下十一其晨占赤烏夜辨黃熊

曾參易簣期於令終子囊城郢沒有遺忠明君輟祭羣臣會同十二其

黃屋左纛輕車介士朝發桐鄉暮歸蒿里積善餘慶由來尙矣公侯

子孫必復其始十三其

初唐四傑文集目錄

楊炯五

唐贈荊州刺史成公神道碑

唐上騎都尉高君神道碑

唐昭武校尉曹君神道碑

益州溫江縣令任君神道碑

原州百泉縣令李君神道碑

唐右將軍魏哲神道碑

初唐四傑文集卷十四

楊炯五

唐贈荊州刺史成公神道碑

成氏之先有周之後姬文受命三十八王邴伯象賢二十一代漢之少府國家維城晉之廣楊王室藩屏公諱知禮其先上谷人也子孫避地徙於某曾祖休寧後魏汾州刺史齊特進左右衛大將軍宇文朝江州刺史隋成陽郡公諡曰武勳格皇天澤充區域該備寵榮兼包命賜祖少遐北齊民曹郎中宇文朝地官上士襲成陽公建國之屬以訓五品以親百姓父綽隋金紫光祿大夫唐深州刺史上柱國天子大夫金章紫綬天王使者阜蓋朱輪公誕保靈和受茲介福講之以學合之以和純粹以積其中文明以宣其外出於口者必是先王之言萌於心者莫非君子之德戒慎乎其所不覩恐懼乎其所不聞時止時行左宮右徵在朝濟濟在家雍雍祗服宏業克丕堂構襲

成陽公歷箕州平城洛州邯鄲二縣令武鄉里閤榆社隄封公宰平
城曰宣三德悲歌相聚絃服成羣公宰邯鄲雷震百里儀刑嘉誨範
乎人倫令問廣譽塞乎天壤將蹈九列平三階豈意太和交薄而天
道難謹降年不永春秋若干以某年月日終於某所夫人宜城縣主
聖神皇帝之堂姊王姬外館之長女夫人道峻於閨房名輝於邦國
我大周敘洪範作武成大賚而萬姓悅垂拱而天下理法號惟舊制
贈荊州刺史生則唐堯不用沒則周武追封爲龍爲光有始有卒立
名於後以顯其親反葬於周不忘其本以某年月日歸葬於某原碣
石恆山燕南趙北禮儀光被宗族相臨大夫弔桓子之喪天子歸惠
公之賄遽瑗之葬不害良田孔邱之塋不生荆棘長子司衛少卿兼
檢校魏州刺史大辨中子左鷹揚將軍大方少子朝議大夫行司漢
主簿大琬等門承四代德盛三賢有終身之憂盡生人之本璽冊褒
贈宜宣無窮景鍾勒銘若古有訓嗚呼哀哉其銘曰

神岳之英大川之精如山之峻如流之清行之斯立言之斯成登車
發耀在邦有聲傳於舊國舊國惟平宰於二縣二縣惟寧余聞舊說
天鑒孔明誰謂靈誕喪落淑貞永錫不匱克揚其名冊書光寵沒有
餘榮系曰列星垂象兮炳天光白露爲霜兮沾人裳彼蒼天兮殲我
良列星垂象兮炳天暉白露爲霜兮沾人衣九原可作兮吾與歸

唐上騎都尉高君神道碑

南方火德陽精赫雷電之威西陸金行秋令毒風霜之氣達其變聖
人所以定天下之文象其宜聖人所以觀天下之變或衣裳六合舞
干戚而掃虔劉或鐘鼓八絃用甲兵而誅暴亂若夫皇天失紀彗孛
飛流后土不綱山河崩塌蚩尤食石災害於生人項羽拔山憑陵於
上國天子聞鼓鼙之響思將帥以龔行將軍屬甲冑之容攬英雄而
決勝則風雲潛感豪傑挺生得七星之武曲破軍受五運之金多木
少四時繫弱射連尹於熬山萬辟太阿殺顏良於官渡然後達人知

足徒興白髮之歌烈士徇名不受黃金之賞與夫棄其筆墨漢家封
萬里之侯稱爾戈矛周王命百夫之長豈可同年而語哉君諱則字
宏規其先渤海人也後代因官遂家於涇州之安定縣神房阿閣泰
山橫日觀之峯金闕銀臺滄海蔽天虛之岸風土形勝關河表裏三
分六州之大業師尙父贊其經綸一匡九合之元勳齊桓公拓其疆
場高柴至德藉東魯之聲名高鳳沈研盛西京之學校英才磊落而
秀發人物蟬聯而間起三光不墜察高星於太紫之宮八柱無疆奠
高嶽於中黃之域曾祖冲北齊鷹揚郎將周左屯衛清宮府別將成
軍夜火教戰秋風九天揚後一之兵六合擁前三之陣張良入漢行
觀滅楚之徵微子奔周坐見亡殷之兆祖赦周褒郡南和縣長陶元
亮攝官於彭澤道契羲皇陳仲弓歷職於太邱德符星緯飄風驟雨
不入灌壇之鄉暴虎蒼鷹潛出瑕邱之境考才朝議郎上開府孫子
荆之天骨亮拔不羣王夷甫之道心神鋒太峻議郎清秩懸符處士

之星開府崇班上接台階之位君雄心獨斷猛氣無前用兵書六甲
於自然知射法三篇於性道早圖星象管公明懷察變之心幼識旌
旗陶恭祖有行師之略屬隋人板蕩天下崩離朱陽夾飛鳥之雲紫
極現雄雞之象陳兵爭戰窺玉策於中州姚石壇場竊金符於寓縣
我高祖黃雲大帝白水真人風雷海嶽之純精天地陰陽之正氣媧
皇受命殺黑龍而定水災漢祖乘機斬白蛇而開火運君夜觀乾象
晝察人情審熒惑之歌謠驗嵩山之讖記關中王氣不勞甘德之言
沛國真星無待殷馘之說賊薛舉豺狼梟獍構机窮奇守幽隴以行
災負關河而作孽天王按劍出軍於玉帳之前猛將分麾受律於金
壇之下以義寧二年王師薄伐趙國公長孫無忌精兵若獸利器如
霜問君以帷幄之謀待君以心腹之寄營當月暈因八門之死生陣
法天星乘五將之關格蔭華蓋歷明堂以我和而制其離以我直而
摧其曲敗楚師於柏舉未足權衡執秦俘於嶠陵無階等級此實君

之功也其年詔授朝散大夫賜物三百段排患而釋滯功成而不居比疏傳而辭榮追留侯以高蹈三靈革故君子於焉待時四海清平謀臣以之歸第自太王基命成康隆玉版之圖高帝受終文武盛金刀之業家給人足天成地平猶勞水旱之餘尙想京坻之積咸亨三年春奉勅於河陽檢校水運使搜粟都尉河堤使者銅橈鐵舳蒼鷹白鶴之船竹箭桃花貝闕龍堂之水引紅粟於淮海汎歸舟於秦晉遂使齊臣獻納先陳不涸之名漢后絲綸卽有常平之號望千石之氣可以療飢開萬箱之儲自然知禮此又君之功也其年詔賜上騎都尉嗟夫河流曲直天道盈虛鬼神莫之要聖賢莫能預高臺下泣孟嘗君之惻愴可知梁木興歌孔宣父之平生已矣上元三年春三月日終於樂邑里之私第享年七十六惟君魁梧動俗符彩驚人忠孝天資溫良日用一門兄弟盡同鍾毓之車千里賓朋時命嵇康之駕每至白雲生海素月流天未嘗不顧盼山河抑揚琴酒馮異之大

樹對諸將而無言子夏之名山謝時人以長往四林遊刃八水忘筌
能祛有漏之因早得無生之法雖十年俱盡陸士衡之長歎有徵而
千載猶生蘭相如之壯心恆在卽以冬十月丁酉葬於安定東南二
十里之平原禮也陶公相宅郭璞占墳面丹鳳而背元龜兆青烏而
徵白馬三百篇之後卜筮何從二千石之榮子孫無替長男仁叡中
男仁楷少男仁護仁昉等或體窮三變潘陸不足以昇堂或力敵萬
夫關張不足以扶轂有元方季方之長幼傳學詩學禮之門風金友
玉昆忠臣孝子窮號積於心髓創鉅纏於肌骨星辰已變昊天無報
德之期霜露潛移君子有終身之感葬之以禮垂制度於三王思之
以時別蒸嘗於四季然後按韋賢之舊德敘潘岳之家風戴逵銘北
海之文張昶刻西山之石若使鄧將軍之一見自得嘉名魏太祖之
來觀懸知絕唱其詞曰

金闕千仞銀宮百常發揮雷雨震動陰陽山水形勝人神會昌九州

霸業賜履勤王樂只君子邦家之光驚雷氣候大昴徵祥運屬飛海
時逢吸霜中原逐鹿西嶽亡羊漢起高帝周興太王乃披荆棘卽奉
壇場國步猶阻黎元未康將軍不拜使者相望陣合星斗兵符玉璜
殲夷叛逆刷滌邊荒化穆三代時清九皇猶思禮節尙試堯湯漕通
淮海水泛舟航蒼鷹鷁軸紫貝龍堂功立身退懸車杖鄉百年俄頃
萬緒悲涼昔時華屋今日元房平天慘慘半月蒼蒼地謂西郭山言
北邙曲池無處松檟成行

唐昭武校尉曹君神道碑

君諱通字某其先沛國譙人也近代因官遂居於瓜州之長樂縣故
今爲縣人焉顓頊高陽之子孫曹叔振鐸之苗裔山河白馬漢丞相
開一代之基譙沛黃龍魏武帝定三分之業承家卹允岳峙星羅居
雍州之西境斷匈奴之右臂門容駟馬旌旗玉塞之雄坐列三貂人
物金行之秀祖某隱居不仕父顯盪寇將軍河庭寶玉廣都鸞鳳或

閭閻之內禮敵於諸侯或枹鼓之間威振於千里功則可大以官族而爲官德亦不孤惟將門而有將君天才卓越雄略縱橫陶謙性好於幡旗王濬志在於長戟東方諫議口誦孫吳諸葛武侯坐吟梁甫屬有隋之末四海分崩皇運之初三光草昧五星同聚田橫猶在於海中九代飛榮隗囂尙屯於隴右賀拔威操符誓衆斬木稱兵以被髮左衽之餘負禱杙窮奇之號遂欲驅馳我塞北撓亂我河西天子不憚於廟堂鼓其雷電使者相望於道路申其弔伐武德元年乃詔侍中楊仁恭出使先之以德義陳之以兵甲七旬于羽不藉有苗之師萬國侯王坐見防風之戮君深知逆順獨斷胸懷去危卽安轉禍爲福非如馬援遨遊二帝之都不學竇融自保三分之重勅授昭武校尉鮮卑醜類慕容殘孽遷於大棘之城止於小蘭之介雖謂其羣下願聞禮於上京而拜於將軍遂誇大於諸國貞觀八年詔特進代國公李靖爲行軍大總管登壇拜將授鉞行師開太一之二門閉陰

符之六甲決勝於俎豆然後折衝萬里信賢如腹心故能匡正八極
君當仁不讓聞義則行從王粲之戎旅棄班超之筆研係單于之頸
有類長沙斬樓蘭之王更加平樂詔除上騎都尉車師舊國俯枕前
庭戍己遺墟斜連後壁負天山而板蕩擁蒲海而虔劉聖人之德非
欲窮兵黷武王者之師蓋爲夷凶靖亂十四年詔兵部尙書侯君集
爲行軍大總管軍營玉帳武略珠韜旌旗蔽於日月金鼓聞於天地
安人保大實憑帷幄之謀斬將搃旗咸藉武夫之力君緬懷高義思
報國恩從來六郡之子是爲萬人之敵梯衝所及披靡堅城矛戟所
臨野無橫陣一舉而清海外再戰而滌河源飲至策勳抑惟恆授詔
除上柱國君備嘗艱阻頻有戰功天子聞之累加徵辟慕田疇之節
羞賣盧龍之塞高魯連之義請從滄海之遊遂乃散髮鄉亭拂衣邱
壑爲趙魏之老在羲皇之年關內諸公深知郭解洛陽人物高談劇
孟家僮有禮皆使拜賓門客多才咸能市義南宮養老坐聞鳩杖之

榮東岳遊魂俄見鶴書之召以龍朔元年某月某日終於里第嗚呼
哀哉夫人某官之女也沅湘降祉河洛騰休符玉石之堅貞貫風霜
之慘烈鏡飛天上窺祥鳳於銀臺劍動星文祕蛟龍於玉匣以某年
某月日終越某年月日合葬於某原君孝實因心忠爲令德鮮花匝
樹盡兄弟之歡娛好鳥鳴林展交遊之宴喜太初朗月俯照金鞍叔
夜清風來生寶劍故能戰必勝攻必取西零種族遙憚武臣北漠酋
豪見稱飛將雖死之日猶生之年園令獨慕於相如漢帝長懷於李
牧長子遊擊將軍和政府右果毅都尉上柱國永雄次子朝散郎行
西州柳中縣主簿上騎都尉知君等三餘廣學百戰雄才就養之方
兼申愛敬慎終之道不忘哀戚雖雨崩防墓無孔子之格言而水齧
前和有文王之故事卽以某年月日改葬於木城之平原長婦某氏
卽永雄之妻也某官之女柔風淑譽習禮聞詩上奉舅姑旁睦娣姒
溫家之婦方歡白玉之臺盧氏之妻空對黃金之椀先以永淳元年

某月日終至是卽陪窆於塋內右翊衛宏軌兵圖日用劍術天知六郡許其良家三川養其聲利思宏祖德願敘家風託無愧之銘跋涉載勞於千仞訪他山之石東西向踰於萬里炯効官昌運負譴明時始以東宮學士出爲梓州司法傾蓋相逢當仁不讓庶使見曹娥之碣楊修歎其好詞讀元壽之文高祖稱其佳作其詞曰

大矣丞相天地寅亮烝哉王侯子孫蕃昌條分葉散源濬流長金城北峙玉關西侯山澤駢羅衣冠輻湊降神生德興賢誕秀曰萬人英材標國楨鬢年學劍非歲論兵以身許國東討西征皇家啓聖撥亂反正逆賊遊魂不恭王命亦旣授首河西大定蕞爾湟中車書未同帝赫斯怒攢其英雄風行電轉谷靜山空二庭遺孽交河路絕天子聞鼙元戎按節王師無戰海外有截歸我田廬功成不居歲云秋矣日月其除壽非金石命也何如孝乎兄弟葬之以禮蓼蓼者莪人生苦多言猶在耳邈若山河

益州温江縣令任君神道碑

漢丞相之尊官大位乘輪滿於十人齊景公之利用厚生有馬盈於千駟羽旄冠劍掞金鳴玉疊其前苑囿池臺清歌妙舞喧其後崇高在於寵祿大欲存於食貨義然後取橫玉帶以當仁道不虛行坐鹽梅而自得若乃時之不與數之不通貴賤任於天窮通由於命左太冲之詠史下僚實英俊之場嵇叔夜之著書賤職爲老莊之地雖復勢力以高下相懸尊卑以商周不敵孔宣父中都之小宰幽厲多謝於陪臣陳仲弓太邱之一官公卿有慚於縣長是以德成者上道在斯尊陶潛則安枕北窗言偃則鳴弦東武抑揚足以儀四海顧盼足以破三軍代有人焉斯爲盛矣公諱晃樂安博昌人也其後因官遂家蒲州之永樂天子令德軒皇爲誕姓之源諸侯計功薛國在宗盟之後西京執法則有御史大夫東漢循良則有會稽都尉任光鄉里之忠厚任隗朝臣之鯁直益州從事術數知名臨海真人清貞克己

况乎東西海岱強齊九合之都表裏山河全晉三分之國車馬雷駭
衣冠鼎盛盟書百代可謂功臣遷徙邱陵實惟豪族曾祖顯祖熙考
憬並策名天爵獨步人師懷素履之幽貞保黃裳之元吉張家碑碣
荊州有七代孝廉荀氏鄉亭潁川有八人才子君外資剛健內育文
明合千載聖賢之間鍾五行金木之秀王恭濯濯春柳懷風和嶠森
森寒松列景有曾參之孝有史魚之直有子夏之文有冉求之藝先
王德行固名言而在茲大聖溫良亦顛沛而於是當朝一見許其王
佐之才行路相逢加以美人之贈解褐爲家令寺主簿天王太子之
位赫赫前星天地長男之宮巖巖左闕出身事主元良永固於萬邦
束髮登朝七鬯不驚於百里秩滿授將作監主簿千門萬戶張華窮
壯麗之圖東主西賓班固盡謳謠之致職掌宮觀是名將作大司馬
桓溫之府績用在於元琳大將軍竇憲之曹文章寄於亭伯累遷右
衛長史南京左掖上將陪藩北落師門天軍列衛東觀漢記梁統有

清白之名中興晉書薛兼有恪勤之譽詔遷朝散大夫行益州温江縣令華陽西極漢水東流背面通秦越之鄉左右夾巴涼之城風煙可接懸車束馬之山雲物潛通織女牽牛之象神仙所宅則有二十四居途路所經則有五千餘里金城石郭還聞上代之風國富人安時聽中和之樂於是乎龍泉獨斷龜兆旁求品命千名封疆萬戶暫過亭長乘軒之望可知且諳中軍理劇之才有屬旌孝悌勸農桑省徭役恤鰥寡所以一縣稱平所以百城尤最蕭育是杜陵男子不入後曹黃浮非鄉里所知不寬同歲洛陽行馬門士無心齊國池魚權家絕望鄭文公邱陵之縣但稱男子之名師尙父灌壇之鄉唯有神人之哭實謂樞機入座上下三階豈惟縛柱鞭絲操刀製錦巫馬期之任力弊起乘星鍾離意之悅人災生解土享年五十有九以儀鳳二年六月二十五日卒於官第夫人姚氏徵士神俊之女也壽邱僊葉嬌水靈苗定姚信之璣衡審姚光之術藝明星燄燄不臨太邱之

前暮雨沈沈不散巫山之曲婦人謂嫁女子有行織絰組紉棗脩榛
栗南斗千齡之匣忽愴沈江北方三代之儀終悲共穴先以咸亨三
年七月二日終於西京翊善里之私第越儀鳳三年冬十一月一日
歸祔於永樂縣歷山之平原卜虞芮之間田帶關河之設險居人致
祭桐鄉有朱邑之祠怪石成墳葉縣有王喬之墓君燕趙奇士神仙
中人容貌魁梧衣冠甚偉揚子雲之窮巷好事來遊段干木之閭居
通侯展敬自陳力就列居家可移妾本絕於織蒲馬無聞於食粟原
子思之厚秩徧給鄉人孔文舉之中罇延留坐客加以備觀圖史尤
精釋教夢幻泡電知一切之皆空園林貨財見三陽之已淨遭時屯
坎浮生蹇剝佳人不再苟奉倩之傷神赤子無期潘安仁之慘慟天
乎到此命也如何及其瞑目少城歸魂舊壤平原古樹唯餘孺子之
墳春露秋霜非復皋陶之祀於是鄉鄰作主朋友加麻撰德銘之於
素常披文刻之於翠石魯哀公作仲尼之誄天不憖遺蔡伯喈爲有

道之碑人無媿色其銘曰

軒帝之族漢朝之臣西州智士東海真人豪傑天縱衣冠日新實生
其德必有其鄰道在爲貴知幾則神氣衝南斗價直西秦大蒙之信
太平之仁辨窮非馬學究成麟孝友爲政觀光利賓重明比德少海
爲春宮室之象南斗北辰甲兵之衛闔闔鉤陳山控金馬江迴玉輪
天文井絡地紀梁岷庭前置水甌內生塵園蠶有績野雉來馴時命
屯蹇生涯苦辛寶釵虛贈玉樹長淪輔德無輔親仁不親百年天枉
一旦歸真雷鳴之下長河之濱旌旃委鬱徒御逡巡悲風汨起血下
霑巾死而可贖人百其身

原州百泉縣令李君神道碑

金城裂地之災玉弩驚天之禍蹴崑崙以西倒蹋泰山而東覆三微
歷數盡薰歇以聲沈萬國衣裳咸土崩而瓦散是故殷憂啓聖聖人
騰海岳之符草昧興王王者受風雷之祉則有思窮圖讖潛觀赤伏

之萌識洞襪祥暗察黃星之兆天懸兩日詢去就於河宗地震三川
考興亡於柱史危邦不入亂邦不居翦荆棘而叩天門臨壇場而對
休命及其元黃再造日月重輪功成而不居名遂而身退南華吾師
也親居賤職東方達人也安乎卑位然後武城絃唱優游禮樂之中
彭澤琴樽散誕羲皇之表雖杜當陽之文武蘭菊猶存而薛孟嘗之
池臺風煙遂歇悲夫死生命也貴賤時也用之則行舍之則藏出處
者君子之恆務左右者君子之攸宜吾聞其語矣今見其人也君諱
楚才衛州衛縣人也昔繞樞神電軒轅氏之馭百靈貫斗祥星顛頊
氏之臨四海金科作範商邱有帝系之雲玉札披圖幽谷有貞人之
氣由是公侯策命歷千載而彌昌鐘鼎歡娛經百王而不替豈直將
軍列位孫吳暗合之兵協律當官天地冥符之樂若斯而已矣曾祖
裕後魏東宮舍人太子洗馬使持節徐州諸軍事徐州刺史燉煌郡
開國公贈兗豫二州刺史直城西望高闕東臨非無置驛之歡實有

前驅之寵琅琊負海八門都督之榮玉漳瀕河百代封侯之貴大父
昌北齊彭城王府中兵參軍事隋濟陰郡守襲封燉煌公文場筆海
炤爛等於星辰辯囿談叢鏗鏘協於風雅九千里之丹鳳始踐王門
七十日之黃龍初階郡職考孝友隋晉州岳陽縣令顏回稱太平王
佐月角殊姿仲由稱禮義霸巨星衡詭狀唐都晉野有恆山太嶽之
風墨綬銅章有錯節盤根之化若夫于公之宅駟馬爭驅辛氏之門
五龍齊駕英靈不已還當命代之期將相有徵克保承家之業東郊
競日探祕跡於璣衡西蜀談元測靈心於造化雄才壯思首九奏而
和八音廣見洽聞披五車而誦三篋加以興居禮樂出入孝忠簡於
一人備於萬物弓旌疊湊始命賢良幣帛交馳載徵巖穴從微至著
濫觴萌括地之波積小成高覆簣漸排雲之構隋大業十二年補謁
者臺散從員外郎非其好也屬三千否運百六災年諸侯窺玉鼎之
尊天子厭金陵之氣蚩尤則命風召雨桀黠於中州共工則折柱傾

維崩騰於海縣能扶天下之危者必據天下之安能除天下之憂者必享天下之樂我高祖神堯皇帝所以從人望宅靈心鎮天關迴地軸鼓聲雷駭親張霹靂之威旌羽星懸手握招搖之柄君冲情索隱妙筭知來候東井而考前聞裂西河而尊故事上略中略奏山石之奇謀文韜武韜奉川璜之祕訣義寧二年授車騎將軍累加開府武德五年遷右衛二十四府右車騎將軍仍於邛州鎮守皇階甫闢猶勞尉候之虛天步初夷尙有風塵之警示之以文德陳之以武功所以外戶不扃所以重門罷柝六年轉中山府左列南州舊俗淫其白獸之祠西燹餘吐背我黃龍之約王師直進陵劍棧以長驅廟略遐宣指銅邱而決勝七年詔君討襲楓天棗地金門玉帳之營方卦圓著剡木弦弓之射以此衆戰誰能敵之以此攻城何城不克雷出而星曜龍騰而鳳飛一鼓而擒四姓三戰而平百濮大夫耆老非唯二十七人拓土開疆豈直五千餘里返行飲至舍爵策勳焉禮也其年

加上大將軍賞口十六人并良馬一匹而俄以爭功得罪游俠從軍
特降王綸遐遷騰府通塞有命潘安仁之緒言富貴在天卜子夏之
餘論無階封禪空嘆息於周南絕望夏臺竟棲遲於漢北太宗文武
聖皇帝承聖皇之大寶奉天帝之休期雷雨八瀛光華四極旌賢赦
過維新之命屢覃念功簡勞惟舊之恩累洽貞觀元年授長樂監仍
命於北門供奉宜春禁苑太液神池浸石菌而揚波擢金莖而挹露
南經丹徼恆陪萬乘之遊北繞黃山再奉三驅之禮當是時也穆穆
焉皇皇焉濟濟焉鏘鏘焉一陰一陽而有序自南自北而無外猶復
中宵不寐殷勤多士之林晷景忘疲渙汗非常之辟十四年應詔四
科舉射策登甲第明於國家之大體達於人事之始終可謂宰相之
璞可謂皇居之寶洛陽才子一承宣室之談魯國儒生行踐中都之
邑尋授靈州鳴沙縣令累遷原州百泉縣令科通紫微印負黃州涼
秋九月寒沙四面平雲匝隴處處而秋陰圓魄低關蒼蒼而夜色君

乘輜演教佩紱臨人德被三城風移五縣抽琴命操還臨單父之堂
繫石飛鳴卽對李泉之學明以御下將水鏡而通輝清以立身共冰
壺而合照神行有感方登玉鉉之階靈化無方獨歎瓊棺之墓春秋
七十有一以顯慶元年十二月八日終於官舍君年十一丁內艱朋
友相哀家人不識昔稱曾閔今日荀何近古以來未之有也隋郡東
曹掾江溢見而歎曰此真可謂保家緯化嗟尙者久之大業末年皇
綱漸紊不掃一室自懷包括之心獨守太元且忘名利之境於時魏
特進房僕射杜相州等並以江海相期煙霞相許付同心之雅會訖
刎頸之良遊或閉戶讀書累月不出或登山涉水經日忘歸斯賢達
之素交蓋千年而一遇洎塵埋五岳海沒三山辭殷而奉周背楚而
歸漢深謀遠慮卽良平無以加也行軍用兵則韓彭不能尙焉數奇
命蹇遂無望於高門日往月來竟銷聲於下邑情均寵辱則萬象同
歸跡混彭殤則百齡俱盡浮生若寄大漸彌留遺誨子孫庶幾薄葬

等梁鴻之宅北邙矣他鄉符祭仲之高居依然新鄭唯仁與達君其
有焉存榮歿哀此之謂也卽以某年月日葬於某原夫人廣平宋氏
齊尙書左丞士順之曾孫隋建安郡司法長文之季女霜淒月瑩菊
艷茗華淑問秀於閨房柔風洽於詩禮琴前鏡裏孤鸞別鶴之哀竹
死城崩杞婦湘妃之怨長子金河府校尉上柱國輔仁等十輪方駕
萬石駢衡窺上帝之兵鈴入先王之冊府指蒼天而永訴血下霑襟
對白日以長號悲來填臆於是總麻執友素蓋賓朋傳祖德於高陽
考豐碑於太學庶使城隍一變猶知鄧艾之名陵谷三遷尙識鍾繇
之字其銘曰

玉斗之英瑤光之精巡河并洛握紀提衡柱史論道將軍用兵陸離
簪紱奕葉公卿岳牧騰譽弦歌有聲階蘭疊影巖桂增榮山澤通氣
風雲表靈凝脂點漆月角珠庭白玉無玷黃金滿籝忠爲令德孝實
天經朋友千里烟霞百靈琴尊野尙松竹山情數屬郡海時逢鬪星

黃龍電震白騎雷驚赫矣高祖元亨利貞聖人有作天下文明自此
提劍因茲間行攀鱗北海附翼南溟水火之陣孤虛之營左提右挈
東討西征巨猾斯斬元兇載清巧符衛霍知若良平自滿知損居中
忌盈蕭條異縣坎壤浮生降以中旨賓於上京陳書詰闕對問揚庭
山連鴈塞野接龍垆朞月而已三年有成波瀾不息箭刻無停梁木
其壞高臺已傾關雲斷絕隴鴈飛鳴頓雙鳧於葉縣踟四馬於滕城

唐右將軍魏哲神道碑

經天緯地之帝求制禮作樂之才撥亂反正之君資拔山超海之力
繼韶夏而崇謚號非無陣戰之風披皇圖而稽文武或用干戈之道
故能彌綸宗廟彈壓山川苞四海以爲家一六合而光宅是以二十
八宿懸列將而察休徵三十五星聚天軍而赫符彩呂望垂竿於渭
涘道峻匡周張良授策於圯橋功崇佐漢乃有心如鐵石氣若風雲
洛讖書名河圖祕象青絲電燭歷大塊以三休碧羽霜淒倚渾天而

一息岑彭許允征南鎮北之名馮異王昌大樹中軍之號杜太行而泥函谷猛氣無前戮封豕而斬長鯨雄圖不測元戎十乘驅衛霍於前軍甲士三千列孫吳於後殿秋風白露執金鼓而齊六軍泰山黃河折銅符而光百代建廟堂之策爲社稷之臣孰能與於此乎在我右將軍矣公諱哲字知人鉅鹿陽曲人也七代祖靖非前秦征北大將軍鎮北地上郡其後子孫因居於寧州襄陽縣開國承家之始誕性命氏之源大名發於本支當塗峻於層構三辰鬱鬱天街分畢昂之都九野茫茫地險列山河之境丞相以萬機論道匡大運以震威嚴尙書以八座當官贊金行而標領袖文昭武穆方駕齊驅公子王孫朱輪華轂大鵬垂翰馭風伯而指南溟天馬騰姿偶雲師而集東道祖唐隋天水郡丞河陽都尉瑤林瓊樹擢標格以千尋圓折方流委波濤而萬頃雄飛有望豈惟京兆之丞陰德不憊何直丹陽之尉父寶皇朝通議大夫總管府司兵參軍事東家孔子至德生於上天

南國申侯明靈誕於中岳君朝翊贊道先王之法言公府弼諧對上天之休命若夫聖人作而萬物覩元首明而庶事康日月粲其光華山川鬱其雲雨則有英靈間出丹陵諧白獸之祥符瑞庭生黑帝感蒼龍之傑隋珠一寸魏后揚眉和璧千金秦王動色顏生殆庶聞於竹馬之年揚子參元發自銅車之歲建情峯而直上疏筆海以橫流彫牆則百堵皆興峻宇則千門並列可大可久無忘簡易之途爲子爲臣率由忠孝之境郭林宗之披霧豈敢名言孔文舉之欽風每相推荐若乃五材並用誰能去兵七德兼施止戈爲武出師於九天之上暗合兵書取睽於十日之前懸符射法固以文武之道揄揚滿於域中將相之才籍甚聞於海內貞觀十五年起家補國子博士喬林掃日警白鳳於詞條璧水澄天駭雕龍於義壑班超慷慨常懷萬里之心季路平生每負三軍之氣十六年勅授左翊衛北門長上祿賜同京官仍令爲飛騎等講禮鄧司徒之舊事馬上讀書祭征虜之前

聞營中習禮宮花如錦還臨拜將之壇槐葉成帷復對閱軍之市自
皇王眷命大帝應期運璇衡而制八方調玉燭而臨四極元兔白狼
之野來奉衣簪蟠桃析木之鄉尙迷聲教太宗文皇帝操斗極把鉤
陳因百姓之心問三韓之罪勝殘去殺上憑宗廟之威禁暴戢姦下
藉熊羆之用公丹心白刃本自輕生六郡三河由來重氣烏江討逆
剖項籍於五侯鹿野懲奸磔蚩尤於四宰二十年詔除游擊將軍右
武侯信義府右果毅都尉長上如故顯慶二年以內憂解職痛深吳
隱哀極顏丁躋厚地以崩魂訴高天而泣血紫泥垂渙頻降璽書墨
纒臨戎遂從金革三年詔除左衛清宮府左果毅都尉尋圉谷府折
衝都尉並長上如故又以應詔舉對策甲科遷左騎衛郎將於時長
榆歷歷烽火猶驚高柳依依邊風尙急關山夜月遂爲丹徼之秋西
北浮雲翻作穹廬之景四年詔公爲鐵勒道行軍總管陳兵玉塞按
節金微學常山之蛇擬麗譙之鶴鐘鼓嘈囂上聞於天旌旗繽紛下

蟠於地伏尸百萬因瀚海而藏舟闢地數千卽燕山而築觀武臣雄
略氣慴西零神將宏圖威加北狄武德元年詔遷左驍騎中郎將尋
檢校右監門左武衛將軍本官如故昔者封禪陟云亭之後七十二
君圖書出河洛以還三千餘歲振兵釋旅方崇薦帝之儀道洽功成
必致禋天之禮粵以皇家闢統之五十年今上開基之十七載登封
告禪玉牒金繩建顯號而施尊名揚英聲而騰茂實華夷輯睦皆承
萬歲之恩朝野歡娛咸奉千年之慶乾封元年詔加明威將軍本官
如故大風遺孽叛渙青邱小水殘魂憑陵碧海率百官於文祖尙興
彭蠡之師會萬國於塗山猶有防風之戮是歲也詔公爲遼東道行
軍總管軍營對日兵氣橫天開玉堂而按部坐金城而勒陣闕鞏之
甲犀兕七重餘煌之舩舳鱸千里駕蠆梁於聖海秦皇息鞭石之威
泛鼈釣於仙洲愚叟罷移山之力然後風行電卷斬將屠城塞丹浦
之遙源伐黑林之奧本王孫公子名霑阜隸之臣深谷大山境入樵

漁之囿二年詔加上柱國仍檢校安東都護導之以德齊之以刑威
振六官風揚五部兵戈載戢無勞尉候之虞桴鼓希聞寧有穿窬之
盜仰太陽而晞湛露方預四朝臨逝水而急寒風俄悲一去齊孟嘗
之下淚高榭曲池魯司寇之悲歌頽山壞木長安杳杳還符日近之
言京兆悠悠竟絕天高之問玉關生入自判無期繡服晨還竟知何
日總章二年三月十六日遘疾薨於府第春秋五十有四嗚乎哀哉
詔贈左監門將軍禮也唯公被服忠孝周旋禮樂仁者見之謂之仁
智者見之謂之智研幾冊府金滕玉版之書索隱兵鈐元女黃公之
法每建旗推轂三令五申躬擐甲冑親當矢石軍井未建如臨盜水
之源軍竈未炊似對嗟來之食由是南馳北走東討西征運之無旁
按之無下載筐宮裏遙登大將之壇飛閣星邊獨列中軍之位雖龍
泉匿字薰歆光沈而鱗閣飛名天長地久夫人扶風馬氏隋濠州刺
史圓之孫也五松春艷牽少女之祥風八桂秋榮降仙娥之寶魄謝

家之子歌柳絮而知慚劉氏之妻頌椒花而自恥三從按禮無虧內
則之風四德揚蕤載闡中閨之訓宿盤龍於月鏡早沒鸞牀矯飛翼
於霞樓先沈鳳穴珠星璧月終陪季子之階金鼎銀罇竟列齊侯之
寢以貞觀十五年五月五日終於某所越咸亨元年某月日祔於某
原長子瓜州司倉擇木次子右衛親衛元封等門傳萬石庭列雙珠
花萼爭榮芝蘭藹秀天經地義欽承避席之談日就月將虔奉趨庭
之教變槐檀而瀝膽木石悲酸代霜露以崩心幽明感動葬之以禮
祭之以時生人之本盡矣死生之義備矣孝子之事親終矣於是門
生故吏共緝家聲才子文人思傳盛德庶使藺相如之生氣歷千載
而猶存隨武子之餘風盡九原而可作其詞曰

文王受命畢公餘慶玉樹連芳金枝疊映三分並列七雄齊競建國
承家重熙累盛功宣蹈舞德流歌詠河洛垂文山川出雲驪珠育照
虹玉呈文直立孤聳天然不羣棲遲膠塾悅懌邱墳恥爲儒者自許

將軍伊祁不懌軒轅討逆陣擁遼河兵屯碣石班超投翰揚雄執戟
弓合三材刀長四尺爰清尉候載澄疆場得人者昌失人者亡皇恩
俾乂帝曰明敷幽桂含馥滋蘭吐芳承天待詔觀國賓王茂績斯遠
英聲克彰鵬池淼漫鷄山禍亂出閩辭家夷兇靜難金微瓦解玉亭
冰泮扈駕天門陪祠日觀萬邦胥悅千齡啓旦斗骨危城占蹄舉兵
丸山霧塞渤海波驚帝赫斯怒王師有征虔劉北貊戡翦東明導以
文軌宣其德刑太微上將文昌貴相非熊非羆令聞令望寵踰軍幕
榮參武帳本謂來朝何期返葬原野蕭瑟風烟悽愴天道如何吞恨
者多松風夜響薤露晨歌秋月如練春雲似羅榮華滅後寒暑經過
青烏邱壠白馬山河

初唐四傑文集目錄

楊炯六

大周明威將軍梁公神道碑

從弟去盈墓誌銘

從弟去溢墓誌銘

從甥梁錡墓誌銘

隰州縣令李公墓誌銘

常州刺史伯父東平楊公墓誌銘

杜袁州墓誌銘

林俊州墓誌銘

常州府史前父東平謝公墓誌銘

開成縣令李公墓誌銘

梁陵縣令墓誌銘

謝美夫墓誌銘

謝美夫墓誌銘

大歐州縣令墓誌銘

謝美夫

謝美夫墓誌銘

初唐四傑文集卷十五

楊炯六

大周明威將軍梁公神道碑

蓋聞君爲元首臣作股肱或論道三槐或折衝千里至有道存俎豆
藝總干戈高視翰墨之英獨布爪牙之旅究青編於學府業有多聞
受黃石之兵符算無遺策故得九功咸敘七德攸彰文武不墜公實
兼美公諱待賓安定臨涇人也竦以英才遠邁知州縣之徒勞鴻以
抗節遐征覽帝京而有作由是五噫標興播金石而騰徽七貴承榮
縮銀黃而疊茂貞規威烈映史凝圖粗紀詠歌無俟詳確高祖禦後
魏駙馬都尉侍中少保金紫光祿大夫揚州總管贈太尉諡昭公食
邑三千戶銀榜增輝玉壺流渥位隆三少化洽五胥旣而幽壟埋魂
終降槐庭之贈高門納駟式居茅社之封曾祖睿宇文周駙馬都尉
鄜秦二州總管光祿大夫兵部尚書隋益州總管蔣國公贈司空食

邑三千戶白水時清乳虎之謠行息祿符垂翼叩馬之諫必申加以
主西序之羣英名高八座導文翁之遺訓學富三巴茂先榮級忽光
泉壤漢祖寵章永存帶礪祖演隋沙州刺史上柱國公踐仲寧之餘
躅奸邪斂手簽孝仁之遠蹤羣胡革面連州跨郡邁陶氏之隆基開
國承家掩張門之累葉父贊隋左千牛備身驪山府上騎柱國皇朝
豐王府諮議雲州司馬冀州長史蔣國公襲良弓於簪笏榮侍紫宮
翼雕戟於巖廊肅趨丹地西園坐讌侶明月而飛文北土行康望浮
雲而展足公漸潤膏腴發靈川嶽七年可識抱杞梓而呈才千里見
知負騏驥而騁駿靈臺遠鑒與霜月而齊明智府宏深共煙波而等
曠踐仁義於區域白璧已輕許然諾於樞機黃金豈重因心孝友宜
於自然率志謙沖得乎所性不脂韋而求達不詭計而自媒被玉軸
之文章三冬遽足窮金壇之祕訣百戰不孤譽滿寰中聲蓋天下而
學優將仕允屬名家欲昇鴻漸之姿終佇鶴鳴之聞以皇朝麟德二

年補左親衛從資例也屬金甲出戰玉帳論兵從命文昌問罪遼碣
公提戈赴海投筆從燕智者有謀仁者必勇孤鋒直進九種於是克
清匹馬橫行三韓由其殄滅疇庸賞最我有力焉俯洽恩波泛承勳
級卽授上柱國公深慚位薄命舛數奇雖霑勒石之勳未展披堅之
效嗟乎揚子雲之才藻空疲執戟馬相如之文詞猶勞武騎今古同
貫夫復何言旣而從牒隨班牽絲祇務起家拜朝議郎永淳元年正
月三十日授伊州伊吾縣丞非所好也路指金河途連玉塞塵沙共
起烽火相驚秋草將腓胡笳動吹寒膠欲折虜騎騰雲公佐佑多方
掌司攸寄服叛懷遠擒奸擿伏於是寇騎不敢窺邊歌頌因茲溢境
曾未朞月政令大行特簡帝心超居不次永淳二年二月四日制授
昭節校尉守右衛蒲州府佐果毅仍令長上兼上陽洛城等門供奉
公洞曉戎章妙詳兵律軍國是賴戎幕允歸由是徼道長巡嚴扃每
奉朝求夕警不怠於風霜善牧能防更申於閑阜其年十月七日奉

勅命於大內祥麟殿檢校馬公識高東野職參西極勵銜策則追風
逐日加剪拂則絕電奔星馱馱將駙隸齊衡驥騮共駟餘伏櫪於是
龍媒間出麟友挺生伯樂多謝於精微日碑有慚於秣養恩制褒獎
又加崇秩文明元年二月二十日遷游擊將軍仍依舊長上大周革
命兩儀開闢爰覃作解之恩式暢惟新之典勤勞夙著休望允歸拜
職遷榮實符僉議天授元年九月十六日加威武將軍守左玉鈐衛
翊善府折衝都尉依舊長上封安定縣開國男食邑三百戶公祇奉
王庭職司兵衛八屯由其增峻五校於是克宣翼翼兢心積劬勞於
歲月勤勤忠志懷跼躅於序時憂能傷人竟成沈疾以長壽二年正
月六日終於神都旌善里私第春秋五十惟公弱不好弄卓爾不羣
九歲明詩七齡通易月初能對卽謝黃童日下相酬還慚夫子經耳
不忘歷口不遺性沈深有器度能倜儻無拓落尤重交友雅愛林泉
月幌風襟每吟謠於牋綵花新葉早必賞會於琴樽加以啼猿落鴈

之奇鸞驚鳳翥之妙瀉水懸河之辨背碑覆局之精標映前哲公實
多敏至孝過人雍和絕俗事父母則造次不違友兄弟則溫柔必盡
旣風樹興感霜露躔悲聿修之德惟新欲報之恩罔極虔誠大象宏
誓小乘廣樹慈仁庶憑因果月抽官俸日減私財並入薰修咸資檀
施故得雕檀之妙俯對禪龕貝葉之文式盈梵宇粵以大周長壽二
年歲次癸巳二月辛酉朔二十四日甲申遷窆於雍州藍田縣驪山
原舊塋禮也葬事之屬一皆官給鼓吹儀仗送至墓所墳開白日終
留恨於滕城禮被皇家忽霑榮於霍隧嗚乎哀哉嗣子左千牛去疑
哀纏泣柏思結殮荼仰庭禮而不違覩楹書而增慕恐元穹倚杵碧
海成桑敬勒堅貞乃爲銘曰

大哉嬴國遠矣少梁與秦同祖今則夏陽爰暨伯翳胙土惟良自茲
厥後人物克昌逮乎漢朝令望不已三世連輝七侯承祉或顯或晦
有文有史烏奕圭璋芬芳蘭芷少保名揚司空道泰惟祖惟禰蟬聯

軒蓋挺生令則在邦之最非歲騰芳髻年超靄君號神童晚稱英傑
佩仁服義既明且哲七步立成五行不輟家惟萬卷韋實三絕詞高
許下學富淹中志惟謹潔心亦沖融溫淳植性朗潤在躬閨門禮洽
朋友財通思若雲飛辯同河瀉兼該小說豈容大雅武擅孫吳文標
董賈樹下啼猿封中試馬且文且武執戟登位海隅不賓命我偏帥
既陪勒石還從飲至輔翊百里褒昇佐貳既總兵權入司宮掖徼道
宵警禁門曉闢式重其駿載懷斯癖我馬既良我軍既雄折衝千里
趨奉九重行承芝誥坐啓茅封恨深負米榮暨擊鐘爰持戒律思答
慈容將福有徵謂仁必壽如何淑德遭此兇咎孺慕崩心惻發縮首
夜泉扃閉天長地久

從弟去盈墓誌銘

古者皇帝軒轅氏沒帝嚳高辛氏作幼而徇齊長而敦敏則天下之
人用其教者百年忠肅恭懿宣慈惠和則天下之人謂之才者八子

赤烏流而白魚躍有周武之興王彤弓一而盧矢千有晉文之啓霸
雖隱公遜位哀侯失國而文之昭也武之穆也司徒爲五教之官有
社稷焉有黎人焉丞相臨萬幾之職嶠函鼎盛赫奕於朱輪河洛台
階昭彰於白玉積善餘慶信而有徵國子進士楊去盈字流謙宏農
華陰人也曾祖諱初周大將軍隋宗正卿常州刺史順陽公皇朝左
光祿大夫華山郡開國公食邑本鄉二千五百戶唐虞之稷契魏晉
之裴王晏嬰可以事百君皋陶爲之謬九德麾蓋兵馬人知牧伯之
尊名山大川地積公侯之氣王考諱安僞鄭王充遙授二十八將封
鄆國公尋謀歸順爲充所害皇朝贈大將軍旌忠烈也陶謙雅尙祖
述雄心會天子之蒙塵見諸侯之釋位雖陳平去就潛懷仗劍之謀
而石勒兇殘遂及推牆之禍父某潤州句容遂州長江二縣令朝散
大夫行鄧州司馬文武兼備清明在躬人無間言位不充量四方取
則孔宣父之踐中都百里非才龐士元之登別駕若夫庭生玉樹身

帶金鑲有衛玠之風神有張良之容貌蔣琬之譏盛允責在司空陳
蕃之對薛勤志清天下觀其昏定晨省立身揚名怪草蔚其休徵神
魚會其冥感莊公獨歎聞穎叔之純深有道相推見茅容之盡禮則
閨門雍穆以孝聞也輔仁會友合志同方晏平仲之善交鮑叔牙之
知我張堪死日妻子唯託於朱暉劉惔生平風月每思於元度則朋
友之德若蘭芬也朱穆好學終日忘餐譙周研精欣然獨笑張華四
海之內若指諸掌班固百家之言無不窮究鈎深致遠悅邱墳也八
音繁會五色章明動天地而感鬼神序人倫而成孝敬陽臺並作楚
襄王賜雲夢之田上林同時漢武帝給尙書之筆則瓊敷玉藻未足
多也自攝齊東序撰杖西膠唯宰我之能言貴顏回之有德成如麟
角道尊於璧水之前翼若鴻毛俯拾於金門之下方將咫尺宣室扈
從明庭申賈誼之忠讜盡揚雄之規諫豫章七載擢修幹而聳長條
有鳥三年搏積風而運滄海豈期數有迤否天無皂白苗而不秀秀

而不實蓋有是夫古人有言沒而不朽者此之謂也春秋二十有六
以上元三年五月二十二日歿於京師勝業里嗚乎哀哉至儀鳳四
年十二月二日歸葬於華陰之某原不忘本也山河鬱鬱松柏蒼蒼
骨肉閉兮歸后土魂魄遊兮思故鄉三荆搖落五都悲涼痛門戶之
無主悼人琴之兩忘嗚乎哀哉銘曰

高掌遠蹠濁涇清渭天子諸侯司空太尉星辰鼓舞山澤通氣道在
者尊德成爲貴賈家三虎偉節最怒荀氏八龍慈明無雙劍光冲斗
壁氣浮江據於道德聞於家邦子之承親温席扇枕子之友悌同輿
共寢朝歌不入盜泉不飲垂露崩雲繁絃縟錦明經太學射策鴻都
揚名天子高揖司徒鱗翮將運波濤不虞子之喪也良可悲夫瞻望
不及佇立以泣唯見黃埃心傷以摧躑躅兮徘徊嗚乎兮哀哉長夜
漫漫何時旦魂兮魂兮歸去來

從弟去溢墓誌銘

處士宏農楊去溢年二十卽華山公之曾孫大將軍之孫朝散大夫
鄧州司馬之第四子也維岳有五有華山之金石焉山阜相屬含谿
懷谷所以鎮其南也維瀆有四有河宗之玉璧焉波瀾汨起洄洑萬
里所以經其北也言其土地則巨靈之高掌遠蹠作西漢之城池敘
其衣冠則太尉之四代五公爲東京之柱國然後積勳累德枝分葉
散大君有命臨夏日之壇場天子動容聽秋風之金鼓是以熊羆入
兆羔鴈成羣黃憲之名聞於海內陳蕃之志掃於天下羣童忽聚逢
苦李而懸知賓客相過問楊梅而卽對善父母爲孝善兄弟爲友居
家可移之道也利者義之和貞者事之幹元亨日新之德也若夫羽
陵遺策汲冢殘書倚相之八索九邱張華之千門萬戶莫不山藏海
納學無所遺至如白雪迴光清風度曲崔亭伯真龍之氣揚子雲吐
鳳之才莫不玉振金聲筆有餘力遠心天授高興生知盡江海之良
圖得煙霞之祕算貞不絕俗從容於名教之場道由人宏坐臥於羲

之代於時朝廷之上山林之下英儒瞻聞之士洪筆麗藻之客希末
光而影集聽餘聲而響和者猶藩籬之望天地鱗介之宗龜龍也嗟
乎陰陽爲道大道無亭毒之心禍福唯人聖人有抑揚之教智焉而
斃仁焉而終今也則亡歎顏回之短命死而可作冀隨會之同歸文
不在茲乎天之將喪也以某年某月某日終於某所越儀鳳四年十
月二日歸葬於華陰之某原林野彌望關山寥廓樵童牧豎孟嘗君
之池臺一去千年丁令威之城郭悲纏於魯衛痛深於花萼姜肱沒
齒無因共被之歡鍾毓生年無復同車之樂嗚乎哀哉銘曰

叔虞建國天錫之唐伯僑受氏食采於楊五侯簪黻四代軒裳有德
有行如圭如璋乃生男子初寢之牀從公小大辨日炎涼天下之寶
邦家之光神鋒太峻旗鼓相當事親以禮左右無方交朋以信芝蘭
有芳文犀健筆白鳳雕章鵬鷗齊致江湖兩忘謂天輔德則惟其常
殲我吉士於何不傷關山搖落洲渚蒼茫黃塵匝地白露成霜左右

刮骨親賓斷腸摧殘玉樹埋沒金鄉交交黃鳥爰集於桑命不可續人之云亡

從甥梁鎡墓誌銘

故右衛率府翊衛安定梁鎡年二十有八以上元三年秋八月某日終於某所圖其景宿天有大梁之星辨其物土地有大梁之物考其衣冠人有大梁之姓綜乾坤而列位兼水木而成文業耕織而樂琴書有梁鴻之雅尚生封侯而死廟食有梁竦之雄圖西山求白鹿之仙東海受黃蛇之寶曾祖某光祿大夫開府儀同三司驃騎將軍清河太守右衛大將軍同州刺史上柱國郡守旁通於月建儀同上法於太階光祿大夫下大夫之職驃騎將軍大將軍之比祖其河南澠池令鄭州司功參軍事冀州蒲州二府司馬朝散大夫紀王府司馬襄州同州二長史仲由宰邑蕭何主吏桓温之徵謝奕暫為司馬之官周景之禮陳蕃仍降題輿之命考某國子學生霍王府參軍并州

大都督府兵曹揚州大都督府錄事參軍仲尼閑居曰參不敏天子
命我參卿軍事張常山之福應直保金鈎謝太傅之閨門唯生玉樹
所以圓光折水真氣衝天孩笑之時見之者知其孝友能言之際聽
之者許其聰明審清河管輅之天文對江夏黃童之日蝕揮其勁翮
則鳳凰飛鳴於赤山整其蘭筋則駿馬騰驤於綠地若夫龍神負卦
瑞雀銜書安釐王汲冢之文穆天子羽陵之籍莫不因條報葉望表
知裏鄭元殫見覽萬卷之八千班固洽聞涉五經之四部至如瑯弧
夜月筋角三材鐵劍秋霜煙雲五色莫不推之以智勇成之以揖讓
歷諸侯而說劍直之無前引司馬而操弓觀者如堵可謂多才天縱
盛德日新曼倩不讓於詩書翁歸兼強於文武由是交道遂廣聲名
益振朱家大俠滕公有然諾之言劇孟過人袁盎有逢迎之禮及其
從微至著資父事君藉丹書之勳業參黑衣之行伍神宮海外瞻鏤
榜於明山太室雲端聽仙簧於洛水翔駕馳道周廬甲觀方當奉詞

出使萬里行封受命忘身三軍拜將豈期年歲朝露浮生過隙漢逸人之雅操命也如何魯司寇之知言苗而不秀嗚乎哀哉望吾子者空懷倚閭之歎嗟予弟者獨有亡琴之悲從日月於龜謀考圖書於馬鬣越以儀鳳三年春二月某日甲子葬於某所悲夫吾見其進由來孔李之家吾謂之甥實曰何劉之族陽元旣歿瞻舊宅而無成康伯不存對元言而誰與銘曰

山河帶礪金木精靈磊磊千丈森森五兵駢驂西掖出入東明人壽無幾皇天不平碑留郭泰挽送田橫終寂寥於相宅空嗟歎於佳城

隰州縣令李公墓誌銘

公諱嘉字大善隴西成紀人也趙郡太守雍州大中正上開府永康公之孫幽州都督鎮軍大將軍上柱國丹陽公之子重華以文明允塞謨九德於臯陶仲尼以恭儉溫良繙六經於柱史將軍李牧人主願其同時河尹李膺天下思其執御况乎衣冠代美祖考家聲占於

日月爲宗周之姬姓誓以山河則炎漢之劉氏公門承將相地積英
靈望之儼然橫斷山而鬱起聽其言也注懸河而不竭玉則秦王所
見天照白虹劍則殷帝所傳星浮紫氣假使蔡中郎之博學郭有道
之人倫何嘗不迎王粲而倒屣爲茅容而下拜起家爲太子左千衛
以調升也按河圖於玉版震一索而爲長男考天象於銅渾心前星
而爲太子直城霞繞曲障雲平出入青牓之門周旋黑衣之列稍遷
越王府戶曹參軍越之建國也地居南斗之躔王之受封也禮極東
門之拜邴霍所以隆懿親共和所以資明德一言而干楚后卽從雲
夢之畋三見而說趙王仍襲上卿之印又遷隰州令川原爽塏風俗
和平晉獻公之嗣夷吾是邑代恭王之子郢容爲侯陽泉依六壁之
城孟津合三溪之水公以輜車就列墨綬當官有蠶績於邠人用牛
刀於魯邑市鄠無競不假鞭絲學校方興唯聞擊石諸侯取其軌則
四海瞻其儀表爲杜陵之男子誰繼後曹蔑鄉里之小人願辭彭澤

於是退歸初服就養私門戲嬰兒於階下扶老生於井上尋丁外艱
哀毀踰制加人一等俯就三年服闋襲封丹陽公勳上騎都尉公以
安車禮盛賜杖年高被服先王之道優游太平之化左琴右書謀孫
翼子居常飽德不言何氏之萬錢直置當仁豈特于公之駟馬清風
可賞必有鸞鳳相期白雪時遊多以神仙見屬義形於金石節貫於
松筠西山五日之朝將化羽而生翼北海明年之驗便展辰而至已
以永淳元年八月二十一日終於京師道政里之私第享年七十二
嗚乎哀哉長子隨州光化縣令守節等哀纏弔鶴痛結鄰人孝之始
也則身體髮膚所以全其性孝之終也則衣裳棺槨所以成其禮天
高八萬想京兆而何從地闊三阡對佳城而有恨越宏道二年歲次
甲申正月甲申朔二十六日己酉陪葬於昭陵東南之平原炯樗櫟
庸材鉅筍小器仰惟先友叨雅契於金環俯逮嘉姻荷深知於玉潤
南容有道僅聞將聖之言東武建瑩俄述安仁之賦嗚乎哀哉乃作

銘曰

爰初帝子堯之大理降及真人國之柱史衣冠百代慶靈千祀吉兆
占熊嘉名贈鯉聿修厥德必復其始大孝因心至仁由己肅成門內
章華宮裏父任爲郎學優則仕陽山之曲蜀江之涘月旦乘鳧田間
狎雉其心若鏡其直如矢亟改炎涼罷歸桑梓象賢舊國安車暮齒
忽愴池臺俄悲生死郭門一望郊煙四起夫復何言平生已矣

常州刺史伯父東平楊公墓誌銘

楊氏之先其來尙矣在皇爲皇軒在帝爲帝譽在王爲周武在霸爲
晉文此之謂不朽西京爲丞相東漢爲司徒魏室爲九卿晉朝爲八
座此之謂世祿公諱德裔宏農華陰人也卽常州刺史華山公之元
孫左衛將軍武安公之長子生而岐嶷代不乏賢事親以孝聞在鄉
黨恂恂如也始以父任爲太子左千牛備身轉秀容華亭福昌雒四
縣令詔封東平公策勳上柱國是時也天子仄席求賢勵精爲化以

公屈臨小縣焉用牛刀處治中別駕之任方展其驥足耳擢拜潁州
幽州二司馬寬以濟猛嚴而不殘每行縣錄囚徒其所平反者十八
九詔徵尚書郎御史中丞審審諒直有王臣之節尋以公事去官復
拜饒州括州越州都督府三州長史在會稽引陂水溉田數千頃人
獲其利於今稱之焉遷棣曹恆常四州刺史歷政清白爲當時所重
於是覽先賢之言知止足之分罷歸初服告老私庭乃率羣從子弟
營別業於宜神鄉之望仙里其制宅也宗廟爲先廩庫爲次居室爲
後喟然而言曰古人所謂歌於斯哭於斯聚國族於斯者吾知之矣
維文明元年夏四月某日薨於正寢春秋八十有五嗚乎哀哉公簡
貴不交流俗非禮不動非禮不行望之儼然聽其言也厲博觀史籍
不學書生尋章摘句而已至於臺閣舊事法令科條莫不成誦在心
若指諸掌凡爲尚書郎二年御史中丞滿歲宰人者四縣上佐及專
城者九州盛德形容被於謠詠門生故吏遍於天下永淳二年興駕

幸東都召見公於金城頓訪以得失公採撫羣言悉心以對高宗嗟
歎者良久賜几杖粟帛鄉里榮之一子令珍早亡朝夕溫清者四女
公慨然有喪明之痛因不豫彌留遺命以弟之子神毅爲後越垂拱
元年春二月某日與夫人隴西李氏合葬於某原禮也遠近會葬千
餘人操筆而爲誄者以百數嗚乎哀哉其銘曰

巖巖華山峻及於天上侵神氣下固窮泉夫惟積德生我大賢其一滔

滔河水中國之紀派別九都經營萬里夫惟積潤生我君子其二惟忻

之城惟華之亭宜陽之地益部之星公爲其宰不殞其名其三汝陰之

國薊門之北陂水朝黃燕雲夜黑公爲其佐日宣其德其四入踐郎官

含香握蘭來居白室直繩明筆潘子一除士師三黜其五邑號鄱陽山

名括蒼東南之美吳會之鄉展其驥足實賴王祥其六四州之大是稱

都會千里之榮卽分麾蓋言旋舊國保茲耆艾其七生爲貴臣死爲貴

神陰堂是夜古木非春鄧攸無子天道何親其八

杜袁州墓誌銘

公諱某字某京兆杜陵人也高辛之撫教萬方堯帝之平章百姓傳稱聖人之後易曰積善之家在夏爲御龍在周爲唐杜三王以降百代可知車服出於南陽衣冠襲於京兆曾祖榮業後魏秦州別駕祖良宇文朝復州長史父舉唐易州司兵參軍事事端履道操矢安貞厚於天爵薄於人位闕里之庭學夫詩禮太邱之門執其羔鴈公孝慈而敬威莊而安狎貫義方周覽典籍服其服則文之以君子之容遂其辭則實之以君子之德起家左翊衛選授貝州司倉參軍事出自中禁在於外臺謹其蓋藏實其倉庾尋遷蓬州咸安許州長社洛州洛陽三縣令地方百里官歷三城言非法度不出於口行非公道不萌於心令不肅而威宣教不舒而德洽轉虢州司馬制授朝散大夫婺州司馬又遷蘇州長史加中散大夫鸞鳳不棲於枳棘鸞雀不集於梧桐宜得其材非公莫可我大周誕受萬國寵綏四方建官惟

賢垂拱而理乃命公爲朝議大夫使持節袁州諸軍事守袁州刺史
天王之使列國之君發其德音而勸不用賞正其顏色而禁不用刑
德成而位尊名遂而身退乞骸告老謝病言歸以某年月日終於淮
海之館春秋七十有七嗚乎哀哉夫人太原王氏魏驃騎大將軍新
昌公平之曾孫唐蜀王府典軍上柱國志隆之女也纂承洪烈嗣續
徽音中外柔嘉小大懷睦夫人之化國風美於鵲巢寶劍之沈夜氣
衝於牛斗享年四十八嗚乎咸亨二年某月日終於長社之官第維
天授三年春二月合祔杜陵之平原禮也王人弔祭儀仗官給長子
某官等毀形於骨痛貫於心父母哀哀昊天莫報佳城鬱鬱白日何
年願述餘風式銘幽壤其銘曰

鳳凰鳴矣于彼高岡顯允君子邦家之光猗歟令德秀於閨房歲云
暮矣池樹荒涼死則同穴如何彼蒼